

四庫全書

經部

欽定四庫全書

經部  
坊記集傳卷一

詳校官監察御史臣沈孫璉

給事中臣溫常綬覆勘

總校官編修臣倉聖脉

校對官編修臣錢 樾

謄錄監生臣康 傑

欽定四庫全書

經部四

坊記集傳

禮類三禮記之屬

提要

臣等謹案坊記集傳二卷明黃道周撰道周有三易洞璣別著錄此書乃道周在經筵日纂輯進呈之本其自序以為聖人之坊亂莫大于春秋故是書之體以坊記為經而每章之下皆臚舉春秋之事以證之但國語所載

若內史過之論號亡近于語怪而以為借神怪以防欲義涉荒忽隱公元年鄭伯克段于鄆而以為為三桓而發夫三桓之事春秋著之詳矣而乃寓其意于鄭伯之克段是舍形而論其影也又戴記本為一篇而分為三十章章各創為之目上卷之目曰大坊第一去亂第二已畔第三章別第四盍旦第五遠害第六人浮于食第七貴讓第八作讓第九可

託第十酌言第十一讓善第十二作忠第十  
三作孝第十四敬美第十五下卷之目曰微  
諫第十六睦族第十七敬辨第十八敬老追  
孝第十九食義第二十教敬教睦第二十一  
卒事第二十二不貳第二十三先事後祿第  
二十四遺利第二十五別嫌第二十六厚別  
第二十七辟遠第二十八民紀第二十九親  
迎第三十亦非說經家法第其意存鑒戒于

君臣父子夫婦兄弟之間原其亂之所自生  
究其禍之所終極言之頗為剴切且坊記之  
文如曰制國不過千乘都城不過百雉家富  
不過百乘以此坊民諸侯猶有畔者是隱為  
春秋書大夫之強起例又云春秋不稱楚越  
之王喪則明著春秋之法孟子引孔子曰其  
義則丘竊取之坊記所述固春秋之義之散  
見者則道周此書亦非漫無所據盡出附會

也乾隆四十五年九月恭校上

總纂官臣紀昀臣陸錫熊臣孫士毅

總校官臣陸費墀





坊記集傳原序

臣聞之記曰禮禁亂之所繇生猶坊止水之所自來也以舊坊為無所用而壞之者必有水敗以舊禮為無所用而棄之者必有亂患亂患之坊莫大於春秋聖人本春以立禮本王以立刑本天以立命命以坊欲刑以坊淫禮以坊德三坊立而亂患息亂患息而後禮樂可舉也易之立坊始於天地以天地而正父子以父子而正君臣以君臣而正夫婦詩始於夫婦春秋始於兄弟三

始雖殊其以坊德坊淫坊欲則一也左氏以春秋之亂魯始於羽父終於三桓晉始於曲沃終於六卿故於鄭伯克段之章首明其義以為寵祿不過都城有制為立坊之要領因而推於桓莊文宣之間外釁所從入內慝所從出歸重於別微明嫌為立坊之要歸坊記因之以端源於禮制鄣流於淫欲先之以敬讓衷之以孝悌終始於富而不驕貴而不淫以為君臣父子夫婦昆弟朋友之所繇正雖其所稱引不過楚喪晉亂吳子三事而

於以定君臣辨上下正妃耦春秋千七百餘事其大指盡於此矣蓋當時天子既作春秋諸子莫讚一辭退而窺其意義不過以扶綱出條明堯舜之道闡文武之憲其大者在於喪葬婚娶其細者至於車服飲食登降揖讓皆示之以節受之以制是天地所以生成萬物之義也春秋以生成萬物為天地之大禮禮失而流於刑刑窮而反於命故先別其條貫以坊之而春秋之義例亦從是以起宋淳化至道間嘗以坊表二記頒賜廷臣今

禮學備在學宮而習者相沿為曲臺遺言無復知為春秋義例之所從出者故復略舉大意使相屬比引伸觸類後有以究其指歸焉黃道周自序

欽定四庫全書

坊記集傳卷一

明黃道周撰

大坊章第一

子言之君子之道辟則坊與坊民之所不足者也大為之坊民猶踰之故君子禮以坊德刑以坊淫命以坊欲

禮者天之教也刑者天之制也命者天之令也王者本天百姓本玉聖人因天與王以立其坊損益百世以為春秋春秋五始皆以明禮糾刑申天之令也命始於元年行於春申於王發於正月著于位順者為

之禮逆者為之刑因人之性無有不足其有不足者情欲泄敗而末流自墮也聖人以性坊情以命坊性察其原始而救其末流故為三坊以著於春秋春秋之禮有郊有禘有朝有聘有薨有葬有祀有饗有親迎有即位有徙王在內者正始為大在外者徙王為大春秋之刑有去爵去名去氏有伐有殺有執有刺有放大有者施之諸侯細者施之于盜在外者坊及盟主在內者坊及小君亦唯是其所命禮王所命刑也天王所命本於無欲故無欲之為天有欲之為人無欲之為王有欲之為霸春秋以是三者差等百王治當世之諸侯大夫故知命者足以立禮立禮者足以去刑去刑者足以作樂崇德殷薦之上帝以配祖考也易恒言禮書恒言刑詩恒言命夫子兼取之以為春秋春秋以命歸天以刑歸王以禮歸聖因三者而為之律度權衡是樂所繇起也樂生于律律生于春秋春秋立而刑與樂不別為經使知命守禮者為之

則刑與樂取之律度而無不足也。是記者所述春秋之旨也。

### 隱公元年春王正月

具四始而不書即位是禮以坊德之始也。禮元妃薨則繼室為夫人。隱公出于聲子。桓公出于仲子。聲子繼正也。仲子非繼正也。而隱公推父之意攝位。以侯桓公既攝位。以侯桓公則必貶母以尊仲子。既貶母以尊仲子。則必不可一日與於會盟。宗祏之位。故隱公之為禮不足於德。其為德不足于禮也。然則桓公即位乎。曰未即位也。未即位則誰為喪主。曰皆攝也。攝則必有嗣主。猶周公之復子也。而宗祏盟會皆稱曰公。故公非攝也。非攝而不即位。為文者也。春秋不以文滅質。故於隱公缺正始焉。

秋七月天王使宰咺來歸惠公仲子之賵

天王使貺仲子則仲子未為夫人也未為夫人而貺之則仲子得為夫人也仲子得為夫人則隱公必沒尊其繼嫡生絀其慈母故寫舍之禍則于是始也

### 二年十有二月乙卯夫人子氏薨

是春秋之與聲子也沒者從夫必曰仲子生者從子必曰夫人天王不以夫人貺仲子通國不得以聲子讓夫人故公有讓而夫人無讓公有攝而夫人無攝也則安得以聲子之夫人為仲子之夫人也

### 三年夏四月辛卯君氏卒

春秋開卷而有疑禮者四焉攝之非君也貺之非死也子之疑夫人也君之疑男子也然而皆實質則無疑之矣仲子非沒天王不貺已為夫人不稱仲子為隱公母不讓夫人此三者天下之至質也隱公不即



位則不以其妻祔廟不以其妻祔廟而不得不以其妻稱君此一者天下之至文也文質者德禮之所從出也隱公以泰伯之文行周公之質不得以泰伯之質還周公之文春秋於此有所不足也有所不足而後坊之坊之如何曰七年而讓讓而終老讓弟之與復辟夫固有其家譜矣

### 五年考仲子之宮

### 初獻六羽

考宮則近於別子也初獻則近於殺也夫猶以為仲子也舉妻從君舉母從夫人正廟從親別廟從貴隆禮從今殺禮從古隱公自以為精於禮也而拘于德故為德而不足以坊禮猶為禮之不足以坊德也

### 桓公元年春王正月公即位

宣公元年春王正月公即位

與夫弑一也宣公未滅矣而其詞同何也夫皆責王也王雖不討而恐有為王討者則必以王為詞故以公與之則亦公之天也夫不即位者不猶得天乎故隱莊閔僖皆得夫四始之正也不得其正而王不正則將假天以正之故為之著王馬耳

文公四年冬十有一月壬寅夫人風氏薨

五年春王正月王使榮叔歸含且賵

三月辛亥葬我小君成風

猶是夫人也襄王得以與成風則桓王亦得以與仲子桓王與仲子則隱公不得尊聲子隱公既以絀其

母夫人則不得不絀其君夫人故文公以其夫人絀於敬嬴敬嬴以其夫人上於哀姜是亦有王也而謂時王之不足以絀滕侯者過也

### 閔公二年夏五月乙酉吉禘于莊公

吉禘者未可以吉禘也去莊公之喪二十有二月邇祥而稱吉殤子般也於子般無喪於莊公稱祥則亦可以吉矣禘者祀祭之通稱也禘祭之禘必於太廟吉祭之禘則於莊公于莊公則可以六羽矣然必八佾者八佾之制不自莊公始也然則何知不為禘也曰不曰致莊公而曰于莊公也然則莊公非始僭者與詩曰周公之孫莊公之子丹楹刻桷自莊公始也曰朱于玉戚白牡駢剛亦不自莊公始也

### 僖公八年秋十月禘于太廟用致夫人

是則禘祭也。禘祭而致夫人，崇姜氏也。崇姜氏者，何霸主之女，與於廟事，副禘薦葢，出于西房。夫有天子之禮樂，馬猶哀姜之用幣也。然則夫人不可致于太廟乎？曰：禘太廟，則志在太廟；致夫人，則志在夫人也。然則夫人之不稱姜氏，何也？曰：致夫人，無所致氏也。然則是禮與？曰：禮也。夫猶有侈心焉。又明年公及夫人姜氏會齊侯于陽穀，是則非禮也。太廟之致夫人，則亦謂此也。

僖公三十一年夏四月四卜郊不從，乃免牲，猶三望。

公羊子曰：三卜禮也，四卜非禮也。求吉之道，三禘嘗不卜郊，何以卜卜郊非禮也？卜郊何以非禮？天子祭天，諸侯祭土，天子有方望之事，無所不通。諸侯山川有不在其封內者，則不祭也。穀梁子曰：夏四月不時也。然則元冬孟春魯可以祭乎？左氏曰：禮不卜常祀而卜其牲，曰牛卜，曰曰牲牲成而卜郊，上怠慢也。望

郊之細也。不郊亦無望可也。然則不卜而可以郊乎？曰：有其舉之舉，不為創人而疑天，其天則從魯之有郊，不自僖公始也。其疑郊則自僖公始也。其疑郊何也？以為諸侯不得郊，而周公得禘禘，則以太廟準於明堂。郊則以闕宮等於園丘，以明堂享周，公則魯公可以配以闕宮享。后稷則魯公不可以祭，不可以祭而後疑之疑，而後卜之卜，而疑而後四之然，則以後之卜者皆疑乎？曰：僖公疑先公者也，後公疑僖公者也。然則不疑而舉之，是乎？曰：何為其不疑而舉之也？頌曰：乃命魯公，俾侯于東，錫之山川，土田附庸，未有殊錫，馬與其不疑而舉之，則何如不疑而曠之也？故僖公之疑先公是也，後公之疑僖公則不是也。然則三望是乎？曰：南望衡霍，西望華首，北望恒阿，則不是也。若泰山、河海，則未為不是也。頌曰：泰山巖巖，魯邦所瞻。奄有龜蒙，遂荒大東，至于海邦。淮夷來同，言十六年于淮之會也。僖公以齊桓愛塔，九合諸侯，再從晉文。

經畧諸夏而卻楚師再朝王所宜其功有可稱者而以郊師二事為儒者詆譏考其從來固已久矣疑而卜卜而不舉在僖公之禮未為壞德也

宣公三年春王正月郊牛之口傷改卜牛牛死乃不

郊

何為其言之厲辭也宣公繼子赤者也子赤甫二年天王之崩甫二月而夸舉之故為之厲辭也厲辭則大其坊不厲辭則不大其坊

成公七年春王正月麇鼠食郊牛角改卜牛麇鼠又食其角乃免牛

夏五月不郊猶三望言猶者通可已之辭也穀梁子曰乃者亡乎人之辭也亡乎人則天矣故君子於禮知刑亦於禮知命也

十年夏四月五卜郊不從乃不郊

讀則不告已遠於君子矣不遠龜筮則猶未遠於君子也

十有七年九月辛丑用郊

是何用之曰不卜而用之也用則不卜卜則不得用或曰春卜也卜以九月上辛而遂用之夏正七月也天王郊以正月則魯郊以七月魯之重秋嘗也先郊而後禘以夏正寅月佩弓韜建龍旂以祈穀于南郊以周正申月載嘗福衡祈成於明堂魯於春秋擇取一馬謂之春秋故春秋者郊社禘嘗之祚也然則是

禮與曰盖有是典焉而世一用之然則成公之為之何也曰是歲也公會尹子單子五國伐鄭盟于柯陵歸而張之夫以盖沙隨之耻則亦舍莒丘者之為也

襄公七年夏四月三卜郊不從乃免牲

孟獻子曰吾乃今而後知有卜筮夫郊祀后稷以祈農事也是故啓蟄而郊郊而後耕今既耕而卜郊宜其不從也然則魯之用郊專為祈穀也專為祈穀而春秋非之何也謂其龍旂大輅用天子之事也然則是誰為之季孫宿之為也季孫新嗣而見討于晉歸而張之亦猶之莒丘也

定公十有五年春王正月鼯鼠食郊牛牛死改卜牛

夏五月辛亥郊



哀公元年春王正月鼯鼠食郊牛改卜牛夏四月辛

已郊

夫是則郊可不用也而猶歲用之春秋舉其不用者而遺其用者以是見刑亦以是見禮以是見禮亦以是見命故禮之不足坊德者聖人有所不取也

然則昭公可謂知禮乎左氏曰公如晉自郊勞至於贈賄無失禮晉侯謂女叔曰魯侯不亦善于禮乎女叔對曰是儀也不可謂禮禮所以守其國行其政令無失其民者也今政令在家不能取也有子家羈弗能用也奸大國之盟陵虐小國利人之難不知其私公室四分民食于他思莫在公不圖其終為國君難將及身不恤其所禮之本末將于此乎在而屑屑焉習儀以亟言善於禮不亦遠乎

公羊子曰昭公將殺季氏告子家駒曰季氏為無道  
僭于公室久矣吾欲殺之如何子家駒曰諸侯僭于  
天子大夫僭于諸侯久矣昭公曰吾何僭矣哉子家  
駒曰設兩觀乘大輅朱干玉戚以舞大夏八佾以舞  
大武此皆天子之禮也且夫牛馬雞婁委已者也而  
柔馬季氏得民衆久矣君無多辱夫雉門兩觀亦不  
自昭公始也禮失以漸而德  
敗以頽故君子防之為貴也

然則春秋誰為知禮者乎曰其鄭子產子太叔楚觀  
射父乎子產卒子太叔為政黃父之會趙簡子問揖  
讓周旋之禮馬對曰是儀也非禮也簡子曰敢問何  
為禮對曰吉也聞之先大夫子產曰禮天之經也地  
之義也民之行也天地之經而民實則之則天之明  
因地之性生其六氣用其五行氣為五味發為五色  
章為五聲淫則昏亂民失其性是故為禮以奉之為  
六畜五牲三犧以奉五味為九文六采五章以奉五

色為九歌八風七音六律以奉五聲為君臣上下以  
則地義為夫婦內外以經二物為父子兄弟姑姊甥  
舅婚媾姻婭以象天明為政事庸力行務以從四時  
為刑罰威獄使民畏忌以類其震耀殺戮為溫慈惠  
和以效天之生殖長育民有好惡喜怒哀樂生於六  
氣是故審則宜類以制六志哀有哭泣樂有歌舞喜  
有施舍怒有戰鬪喜生于好怒生于惡是故審行信  
令禍福賞罰以制死生生好物也死惡物也好物樂  
也惡物哀也哀樂不失乃能協夫天地之性是以長  
久故如子太叔之言禮則通于命矣禮之與命非二  
物也是所謂哀樂之  
節而中和之本也

楚子期祀致牛俎于楚子楚子問觀射父曰祀牲何  
及對曰祀加于舉天子舉以太牢祀以會諸侯舉以  
特牛祀以太牢卿舉以少牢祀以特牛大夫舉以特  
牲祀以少牢士食魚炙祀以特牲庶人食菜祀以魚

上下有序民則不慢王曰其大小何如對曰郊禘不  
過爾粟烝嘗不過把握王曰何其小也對曰夫神以  
精明臨民者也故求備物不求豐大是以先王之祀  
也以一純二精三牲四時五色六律七事八種九祭  
十日十二辰以致之百姓千品萬官億醜兆民經入  
咳數以奉之明德以昭之蘇聲以聽之以告徧至則  
無不受休楚子曰祀不可以已乎對曰祀所以昭孝  
息民撫國家定百姓也古者先王日祭月享時類歲  
祀諸侯舍日卿大夫舍月士庶人舍時天子徧祀羣  
臣品物諸侯祀天地三辰及其土之山川卿大夫祀  
其禮士庶人不過其祖日月會于龍苑王氣舍收天  
明昌作百嘉備舍羣神頻行國于是乎烝嘗家于是  
乎嘗祀于是乎合其州鄉朋友婚姻比爾兄弟親戚  
于是乎弭其百苛於其讒慝合其嘉好億其上下以  
申固其姓上所以教民虔也下所以昭事上也天子  
禘郊之事必自射其牲王后必自春其粢諸侯宗廟

之事必自射其牛刲羊擊豕夫人必自舂其盛況其  
下人誰敢不戰兢以事百神楚子曰所謂一純二精  
七事者何也對曰聖王正端冕以不違心帥其羣臣  
以臨監事無有奇慝于神謂之一純玉帛為二精天  
地民及四時之務謂之七事是射父之言祀猶未及  
于禮也又以天地三辰濫諸侯之祀然已得其意足  
為民坊故世之  
知禮者不衆也

然則齊桓公可謂知刑乎殺我姜氏不阿其親於是  
慶父殪於莒曰姜氏襄公之屬也我桓公之夫人非  
桓公所得而殺也且慶父未戮而戮姜氏非所為令  
也台陵之會執轅濤塗以為罪屨之不共則猶有申  
侯之讒焉晉滅虞虢而不能討也楚伐江黃而不能  
救也然則春秋皆刑也無復知刑者與魯之兩刺皆  
哀也諸侯之殺其大夫者  
無數而皆不得其主名

然則春秋孰為知刑者乎曰公子友叔向楚子其可謂知刑乎季友既醜叔牙越在陳國人召而歸之共仲出奔莒共仲以為季子歸不吾討也而季子竟討之召於莒使奚斯哭之共仲乃縊而死故季友為政而醜一兄殺一公子使齊桓公不敢有其姑姊妹故季友可謂知刑矣羊舌鮒者叔向之弟也邢侯與難子爭田難子納女於鮒以求直及弊獄之日叔魚抑邢侯邢侯殺叔魚與難子于朝韓宣子患之叔向曰三姦同罪請殺其生者而戮其死者宣子曰如何對曰鮒也驚獄難子賈之以其子邢侯非其官也而干之夫以回驚國之中與絕親而置直非司寇而擅殺一也遂施邢侯氏而尸叔魚難子于市故叔向可謂知刑矣宣公十一年冬楚子伐陳謂陳人無動吾將討於少西氏遂入陳殺夏徵舒輟諸栗門以徵舒之惡親弑其君踰年莫討而楚子討之楚子不可謂知刑乎而春秋黜之以為楚人何也株林之亂罪在靈

公及公孫寧儀行父靈公已弑陳國已滅而楚人不  
討二子又納之於陳是春秋所謂楚人也然則春秋  
之刑如何曰春秋之刑察其源而大其坊者也察其  
源而大其坊如何趙穿弑君而趙盾不禁則趙盾之  
罪浮於趙穿鄭子公弑君而子家不禁則子家之罪  
浮于子公謂趙盾之足以制趙穿子家之足以制子  
公也然則春秋不畏逸賊與曰畏逸賊也畏逸賊則  
齊商人之死不討歟職莒庶其之弑不討莒僕晉胥  
童之弑不討欒書鄭髡頑之卒不討子駟楚子麋之  
卒不討棄疾蔡侯申之卒不討公孫翩者何也曰各  
有取之也以國者與國以人者與人存正者去疑存  
大者舍細然則春秋諉獄與曰何為其諉獄也出欒  
書而入趙盾出去疾而入歸生生子駟而入子干出  
陽生而入陳荼出莒僕而入許止也曰是天制之非  
人所能定也不明禮不足以明刑故  
聖人重言之也亦共言禮而已矣

然則邾文公可謂知命乎邾文公卜遷於繹史曰利于民而不利于君邾子曰苟利于民孤之利也天生民而樹之君以利之也民既利矣孤何與焉左右曰命可長也君何弗為邾子曰命在養民死之修短時也民苟利矣吉莫如之遂遷于繹遷而邾文公卒君子曰知命夫有知命而從宋襄公用人於社者乎命者春秋之所罕言也春秋以命與王以王與天謂王足以命禮則書王以賜仲子成風謂王足以命刑則書天王殺其弟佖夫王札子殺召伯毛伯謂王足以命命則書王使榮叔來錫桓公命故以命與王以王與天聖人于此亦未有定也亦曰與禮而已矣

然則春秋孰為知命者乎曰皆在于周室其人無事端內而道古本天稱王足以炤四方之善敗若內史過內史興單襄公劉康公其人也惠王十五年有神降于莘王問于內史過曰是固有之乎對曰有之國



之將興其君齊明衷正精潔惠和其德足以昭其馨  
香其惠足以同其民人神饗而民聽故明神降之觀  
其政德而均布福焉國之將亡其君貪冒辟邪淫佚  
怠荒麤穢暴虐其政腥臊馨香不登其刑矯誣百姓  
攜貳民神怨恫無所懷依故神亦往焉觀其苛慝而  
降之禍是以或見神以興或見神以亡昔夏之興也  
融降于崇山其亡也回祿信于聆隧商之興也禱机  
次于丕山其亡也夷羊在牧周之興也鸞鷲鳴于岐  
山其衰也杜伯射王於鄗是皆明神之志也王曰今  
是何神也對曰昔昭王娶於房是曰房后實有奧德  
協于丹朱丹朱馮身以儀之生穆王馬寶照臨周之  
子孫而禍福之繇是觀之其丹朱乎王曰誰受之對  
曰在虢土然則何為對曰臣聞之道而得神謂之逢  
福淫而得神是為貪福今虢少荒其亡乎王曰幾何  
對曰昔堯臨民以五今其曹見神之見也不過其物  
由是觀之不過五年是史過之語異于春秋之不過其語

也故有借神怪以坊欲者史過是也

晉文公之初入也襄王使太宰文公及內史與錫公命上卿逆于境晉侯郊勞館諸宗廟饋九宰設庭燎及期命于武宮設桑主布几筵太宰泣之晉侯端委而入太宰以王命命冕服內史贊之三命而後即冕服既畢賓饗贈餞如公命侯伯之禮而加之以宴好內史與歸以告王曰晉不可不善也其君必霸逆王命敬奉禮義成敬王命順之道也成禮義德之則也則德以道諸侯諸侯必歸之且禮以觀忠信仁義也忠分則均仁行則報信守則固義節則度分均無怨行報無匱守固不偷節度不撓若民不怨而財不匱今不偷而動不撓其何事不濟臣入晉境四者不失其能禮矣樹于有禮艾人必豐王其善之王從之使于晉者道相逮也先是內史過錫晉惠公命呂甥卻芮相晉侯不敬晉侯執玉卑拜不稽首內史過歸告

王曰晉不亡其君必無後且呂卻將不免史過又曰昔者先王既有天下又崇立上帝明神而敬事之於是乎有朝日夕月以教民事君諸侯春秋受職于王以臨其民大夫士日恪位著以儆其官庶人工商各守其業以供其上猶恐有失墜也故為車服旗章以旌之為摯幣瑞節以鎮之為班爵貴賤以列之為令聞嘉譽以聲之猶有散遷解慢而著在刑辟流在裔土於是乎有蠻夷之國有斧鉞刀墨之民而况可淫縱其身乎夫晉侯非嗣也而得其位亶亶怵惕保任戒懼猶曰未也若將廣其心而遠其隣陵其民而卑其上何以固守夫執玉車替其摯也拜不稽首誣其王也替摯無鎮誣王無民夫天事恒象任大享重者必速及故晉侯誣王人亦將誣之欲替其鎮人亦將替之大臣享其祿弗諫而阿之亦將及焉八年晉侯隕於韓懷公殺而甥芮與于難故曰威儀所以定命也知禮而後知命若史與史過者知所以定命矣

定王八年使劉康公聘魯發幣于大夫季文子孟獻子皆儉叔孫宣子東門子家皆侈歸王問魯大夫孰賢對曰季孟其長處魯乎叔孫東門其亡乎若家不亡身必不免王曰何故對曰臣聞之為臣必臣為君必君寬肅宣惠君也敬恪恭儉臣也寬所以保本也肅所以濟時也宣所以教施也惠所以和民也本固而功成施徧而民阜乃可以長保民矣其何事不徹敬所以承命也恪所以守業也恭所以給事也儉所以足用也以敬承命則不違以恪守業則不懈以共給事則寬於死以儉足用則遠於憂承命不違守業不懈寬于死而遠于憂則可以上下無隙矣其何任不堪上任而徹下堪其任所以令聞長世也今二子者儉則能足用矣足用則族可以庇二子者侈侈則不恤匱匱而不恤憂必及之廣其身國家弗堪亡之道也王曰幾何對曰東門之位不若叔孫而泰侈馬不可以事二君叔孫之位不若季孟而亦泰侈馬不

可以事三君若皆早世猶可若登年以載其毒必亡  
十六年魯宣公卒赴者未及東門氏來告亂子家奔  
齊簡王十一年魯叔孫宣伯亦奔齊  
故王季子知命亦所謂知刑者也

柯陵之會單襄公見晉厲公視遠步高晉卿卻錡見  
單子其語犯卻犇見其語迂卻至見其語伐齊國佐  
見其語盡魯成公見言及晉難及卻犇之譖單子曰  
君何患焉晉將有亂其君與三卻當之乎魯侯曰寡  
人懼不危焉今君曰晉將亂敢問天道乎抑人故也  
對曰吾非瞽史焉知天道吾見晉君之容而聽三卻  
之語矣殆必禍者也夫君子日以定體足以從之是以  
觀其容而知其心矣日以處義足以步目今晉侯視  
遠而足高目不在體而足不步目其心必異矣目體  
不相從何以能久夫合諸侯國之大事也國將无咎  
其君在會步言視聽必皆無謫則可以知德矣視遠  
日絕其義足高日棄其德言應日反其信聽淫日離

其名夫日以處義足以踐德口以庇信耳以聽名者也故不可不慎也偏喪有咎既喪則國從之晉侯奭二吾是以云夫卻氏晉之寵人也三卿而五大夫可以戒懼矣高位實疾債厚味實腊毒今卻伯之語犯叔迂季伐犯則陵人迂則誣人伐則掄人有是寵也而益之以三怨其誰能忍之雖齊國子亦將與焉立於淫亂之國而好盡言以招人過怨之本也唯善人能受盡言齊其有乎吾聞之國德而隣于不修必受其福今君偪於晉而隣于齊齊晉有禍可以取霸無德之患何憂于晉且夫長翟之人利而不義其利淫矣流之若何魯侯歸乃逐叔孫僑如明年晉殺三卻又明年晉人弑厲公齊人殺國武子故遠於禮則必近于刑近于刑則必遠于命王季子單襄公非知命也亦曰知禮而已

然則端木賜可謂知命乎定公十五年春王正月邾子來朝子貢觀馬邾子執玉高其容仰公受玉卑其

容俯于貢曰以禮觀之二君者皆有死亡焉夫禮死  
生存亡之體也將左右周旋進退俯仰於是乎取之  
朝祀喪戎于是乎觀之今正月相朝而皆不度心已  
亡矣嘉事不體何以能久高仰驕也卑俯替也驕近  
亂替近疾君為主其先亡乎故命禮刑此三者相  
為終始也有是三三者以坊其不足則春秋具至矣

## 去亂章第二

子云小人貧斯約富斯驕約斯盜驕斯亂禮者因人之  
情而為之節文以為民坊者也故聖人之制富貴也使  
民富不足以驕貧不至於約貴不慊於上故亂益亡

魯隱公元年夏五月鄭伯克段于鄆

左氏曰初鄭武公娶于申曰武姜生莊公及共叔段莊公寤生驚姜氏故名曰寤生遂惡之愛共叔段欲立之亟請于武公弗許及莊公即位為之請制公曰制巖邑也虢叔死焉他邑唯命請京使居之謂之京城大叔祭仲曰都城過百雉國之害也先王之制大都不過參國之一中五之一小九之一今京不度非制也君將不堪公曰姜氏欲之馬辟害對曰姜氏何厭之有不如早為之所無使滋蔓蔓難圖也蔓草猶不可除况君之寵弟乎公曰多行不義必自斃子姑待之既而大叔命西鄙北鄙貳于己公子呂曰國不堪貳君將若之何欲與大叔臣請事之若弗與則請除之毋生民心公曰毋庸將自及大叔又收貳以為己邑至于廩延子封曰可矣厚將得衆公曰不義不暱厚將崩大叔完聚繕甲兵具卒乘將襲鄭夫人將啟之公聞其期曰可矣命子封帥車二百乘以伐京京叛大叔段段入于鄆公伐諸鄆五月辛丑大



叔出奔共書曰鄭伯克段於鄆段不弟故不言弟如  
二君故曰克稱鄭伯譏失教也謂之鄭志不言出奔  
難之也公羊氏曰克之者何殺之也殺則曷謂之克  
大鄭伯之惡也曷為大鄭伯之惡母欲立之已殺之  
如勿與而已矣穀梁之說猶是也夫公穀則未知春  
秋之意也春秋之意以越禮自下坊德自上節情而  
止亂君子之事也叔段欲京則與之京欲貳則與之  
貳無禮以止之則猶之教驕亂者矣教驕亂而後克  
之則幾乎恐不克之也夫是為三桓而發也夫子以  
叔段起三桓以鄆起郈與費圍成之不克亦夫子之  
所憇也夫子將筆之書又與二三子討論其義丁寧  
于坊表之始故坊表記者春秋之開塞也得其三坊  
而春秋之義  
燦乎著矣

隱公四年二月戊申衛州吁弑其君完

左氏曰衛莊公娶于齊東宮得臣之妹曰莊姜美而無子衛人所為賦碩人也又娶于陳曰厲嬀生孝伯早死其娣戴嬀生桓公莊姜以為己子公子州吁嬀人之子也有寵而好兵公弗禁莊姜惡之石碯諫曰臣聞愛子教之以義方弗納于邪驕奢淫佚所自邪也四者之來寵祿過也將立州吁乃定之矣若猶未也階之為禍夫寵而不驕驕而能降降而不憾憾而能眈者鮮矣且夫賤妨貴少陵長遠間親新間舊小加大淫破義所謂六逆也君義臣行父慈子孝兄愛弟敬所謂六順也去順放逆所以速禍也君人者將禍是務去而速之母乃不可乎弗聽其子厚與州吁游禁之不可桓公立石碯乃老於是州吁弑桓公石碯亦遂殺厚也故左氏之為傳深達于坊記之義也小人之約至于盜盜至于尉止齊豹公孫翮陽虎刑之所得而誅也小人之驕至于亂亂至于叔段州吁刑之所不得而誅也刑窮而後兵兵窮而先王之禮教

道命皆盡矣故鄭衛之詩春秋所為坊始也

左傳初晉穆侯之夫人姜氏以條之役生太子命之曰仇其弟以千畝之戰生命之曰成師師服曰異哉君之命子也夫名以制義義以出禮禮以體政政以正民是以政成而民聽易則生亂嘉耦曰妃怨耦曰仇古之命也今君命太子曰仇弟曰成師始兆亂矣凡其替乎惠之二十四年晉始亂故封桓叔于曲沃靖侯之孫欒賓傳之師服曰吾聞國家之立也本大而末小是以能固故天子建國諸侯立家卿置側室大夫有貳宗士有隸子弟庶人工商各有分親皆有等衰是以民服事其上而下無覬覦今晉甸侯也而建國本既弱矣其能久乎惠之三十年潘父弑昭侯而納桓叔不克晉人立孝侯曲沃莊伯又伐翼弑孝侯其後曲沃卒有晉詩所為賦椒聊也故左氏之義與坊表同旨也

昭公元年夏秦伯之弟鍼出奔晉

左氏曰秦后子有寵于桓如二君于景其母曰弗去懼選癸卯鍼適晉其車千乘書曰秦伯之弟鍼出奔晉罪秦伯也后子享晉侯造舟于河十里舍車自雍及絳歸取酬幣終事八反司馬侯問曰子之車盡于此乎對曰此之謂多矣若能少此吾何以得見女叔齊以告公曰秦公子必歸臣聞君子能知其過必有令圖冷圖天所贊也秦公子亦可謂驕而不降者矣何令圖之有

襄公二十二年楚殺其大夫公子追舒

左氏曰楚觀起有寵于令尹子南未益祿而有馬數十乘楚人患之王將討焉子南之子棄疾為王御士王每見之必泣棄疾曰君三泣臣矣敢問誰之罪也王曰令尹之不能爾所知也國將討焉爾其居乎對

曰父戮子居君安用之洩命重刑臣亦不為王遂殺  
子南于朝轅觀起于四境于南之臣謂棄疾請尸棄  
疾不可三日乃請許之其徒曰行乎曰吾與弑吾父  
行將馬入然則臣乎曰棄父事讎吾弗忍也遂縊而  
死甚矣棄疾之似張宗魯也追舒之罪未至死故春  
秋不去其公子而存其大夫棄疾不以尸謝楚而以  
死出其父是則與于弑父者也然而楚子可謂能制  
矣先是申侯有寵于楚文王文王將死與之璧使行  
曰唯我知女女專利而不厭予取予求不女瑕疵也  
後之人將求多于女女必不免我死女必速行無適  
小國將不女容馬既而不容于鄭故如楚文王亦可  
為能制矣然而無當于禮知禮者其唯齊晏子乎  
左氏曰齊侯與晏子坐于路寢公嘆曰美哉室其誰  
有此乎晏子曰敢問何謂也公曰吾以為在德對曰  
如君之言其陳氏乎陳氏雖無大德而有施于民豆  
區釜鍾之數其取之公也薄其施之民也厚公厚斂

馬陳厚施馬民歸之矣詩曰雖無德與女式歌且舞  
民歌舞之矣公曰善哉是可若何對曰唯禮可以已  
之在禮家施不及國民不遺農不移工賈不變士不  
濫官不滔大夫不收公利公曰善哉我不能矣吾今  
而後知禮之可以為國也齊  
之不知禮者其唯慶封乎

### 襄公二十八年冬齊慶封來奔

左氏曰慶封伐內宮弗克反陳于嶽請戰弗許遂來  
奔獻車于季武子美澤可以鑑展莊叔見之曰車甚  
澤人必瘁宜其亡也叔孫穆子食慶封慶封汜祭穆  
子不悅使工為之誦茅鴟亦不知既而齊人來讓奔  
吳吳勾餘予之朱方聚其族焉居之富于其舊子服  
惠伯謂叔孫曰天殆富淫人慶封又富矣穆子曰善  
人富謂之賞淫人富謂之殃天其殃之也其將聚  
而殲旃夫穆子則庶乎知命也命者天所坊欲也

定公十四年春衛公叔戌來奔

左氏曰初衛公叔文子朝而請享靈公退見史緡而告之史緡曰子必禍矣子富而君貪罪其及于乎文子曰然吾不先告子是吾罪也君既許我矣其若之何史緡曰無害子臣可以免富而能臣必免于難上下同之成也驕其亡乎富而不驕者鮮吾唯子之見驕而不亡者未之有也成必與馬及文子卒衛侯始惡于公叔戌戌又欲去夫人之黨夫人愬之曰戌將為亂故曰約斯盜驕斯亂以文子之文也而不能庇其子其道不足以制富貴故也制富貴則可以制亂矣

已畔章第三

子云貧而好樂富而好禮衆而以寧者天下其幾矣詩

云民之貪亂寧為荼毒故制國不過千乘都城不過百雉家富不過百乘以坊民諸侯猶有畔者

襄公十有一年春王正月作三軍

左氏曰季武子將作三軍告叔孫穆子曰請為三軍各征其軍穆子曰政將及子子必不能武子固請之穆子曰然則盟諸乃盟諸僖閔詛諸五父之衢正月作三軍三分公室而各有其一三子各毀其乘季氏使其乘之人以其役邑入者無征不入者倍征之孟氏使半為臣若子若弟叔孫氏使盡為臣不然不含有是穆子之盟之也穆子盟之而曰使盡為臣何也臣有定祿者也政無定祿者也子弟亦定也政無定也季氏樂其無定者以要於仲叔仲叔執其有定者以要于季氏則盟詛相挾矣季氏于是則必有悔也曰



地卒為三國列于諸侯故晉之分合如其國制則文景悼三公之為也故三公者教畔者也

### 定公十三年秋晉趙鞅入于晉陽以叛

左氏曰晉趙鞅謂邯鄲午曰歸我衛貢五百家吾舍諸晉陽邯鄲人不可趙孟怒囚邯鄲午涉賓遂殺午也以邯鄲叛趙人圍邯鄲邯鄲午荀寅之甥也荀寅范吉射之姻也不圍邯鄲將攻趙氏董安于聞之告趙孟曰先備諸趙孟曰晉國有命始禍者死為後可也趙鞅奔晉陽范中行以晉人圍之是則趙鞅未為叛也趙鞅之叛為欲富也請衛俘不與公圍邯鄲不與公入晉陽不歸于公則將誰歸乎

### 冬晉荀寅士吉射入于朝歌以叛

左氏曰范舉夷無寵于范吉射梁嬰父寵于知文子韓簡子惡荀寅魏襄子惡吉射欲以臯夷代吉射嬰

父代荀寅知太子言于晉侯曰君命大臣始禍者死載書在河今三臣始禍而獨逐鞅刑不均矣請皆逐之冬十一月荀躒韓不信魏勇多奉公以伐范中行氏不克遂伐公國人敗之奔朝歌荀寅士吉射則叛矣叛猶之爭卿也欲富之與欲寵孰多乎故晉陽之與朝歌異情而同辭蓋三郤自樂祁而後其為叛者猶是矣而獨以朝歌為君側則與於晉陽之過也

成公十有五年秋宋華元出奔晉宋華元自晉歸于宋宋殺其大夫山宋魚石出奔楚

左氏曰宋共公既葬于是華元為右師魚石為左師蕩澤為司馬華喜為司徒公孫師為司城向為人為大司寇鱗朱為少司寇向帶為太宰魚府為少宰而蕩澤弱公室殺公子肥華元曰我為右師司君臣之

訓今公室卑而不能正罪大而不能治敢賴寵乎乃  
出奔晉二華戴族也司城莊族也六官皆桓族也魚  
石將止華元魚府以為不可右師反必討是無桓氏  
也魚石曰右師反必不敢即討猶有戍在雖亡必偏  
乃自止華元於河上請討蕩氏華喜公孫師乃攻蕩  
氏殺子山魚石向為人鱗朱向帶魚府出舍於睢上  
華元亦止之不可冬十月又止之不可乃反魚府曰  
今不從不得入矣馳而從之則決睢濫閉門登陴矣  
左師二司寇二宰遂奔楚華元使向戍為左師老佐  
為司馬樂裔為司寇以靖國人桓族之亡則亦寵祿  
過也以五世之公族為四卿二大夫而猶不自戢至  
於車公室殺及公子可謂衆而不寧者矣然則宋之  
有六卿禮與曰禮也商政與客各因其舊然則亦有  
三軍與曰軍出於乘乘出于甸三百十六里而出車  
千乘從此而降不及二軍宋  
之淫威則亦其澤存焉耳

昭公二十有一年夏宋華亥向寧華定自陳入于宋

南里以叛

於是華向之族亦皆八九世矣而世執國柄鬼閻之戰華向奔陳華費遂為大司馬生華貙華多僚華登貙為少司馬多僚為御士惡之譖諸公曰貙將納亡人巫言之公不可多僚曰君若愛司馬則如亡死如可逃何遠之有公懼使人告司馬司馬嘆曰必多僚也吾有讒子而不能殺以辱君命可若何乃與公謀逐華貙華貙之徒不勝忿殺多僚劫費遂以叛召諸亡人入於南里以叛冬華登以吳師救華氏公欲出厨人濮曰吾小人可藉死不能送亡君請待之齊烏枝鳴戍宋謂曰用少莫如齊致死齊致死莫如去備彼多兵矣請皆用劍從之華氏北復即之厨人濮以囊荷首而走曰得華登矣遂敗華氏于新里盖自魚

石子山以來華向之族三世再叛皆殺公族質公子十數年未已也民之貪亂寧為荼毒是之謂與

### 昭公十一年夏楚公子棄疾帥師圍蔡

左氏曰楚子城陳蔡不羹使棄疾為蔡公王問於申無宇曰棄疾在蔡何如對曰擇子莫若父擇臣莫若君鄭莊公城櫟而真子元馬使昭公不立齊桓公城穀而真管仲馬至今賴之臣聞五大不在邊五細不在庭親不在外羈不在內今棄疾在外鄭丹在內君其少戒王曰國有大城何如對曰鄭京櫟實殺曼伯宋蕭亳實殺子游齊渠丘賈殺無知衛蒲戚實出獻公由是觀之則害于國末大必折尾大不掉君所知也又明年楚公子比公子黑肱公子棄疾蔡朝吳帥陳蔡不羹許葉之師以入楚楚靈以是卒于乾谿

昭公二十三年冬楚囊瓦為令尹城郢沈尹戌曰子常必亡郢苟不能衛城無益也古者天子守在四夷

天子卑守在諸侯諸侯守在四隣諸侯卑守在四竟  
慎其四竟結其四援民狎其野三務成功民無內憂  
而又無外懼國馬用城今吳是懼而城于郢守巴小  
矣卑之不獲能無亡乎昔梁伯溝其公宮而民潰民  
棄其上不亡何待夫正其疆場修其土田險其走集  
親其民人明其五侯信其隣國慎其官守守其交禮  
完其守備不僭不貪以待不虞又何畏矣詩曰無念  
爾祖聿脩厥德無亦監乎若教蚡冒至于文武文土不  
過同慎其四竟猶不城郢今土數圻而郢是城不亦  
難乎定公四年囊瓦敗于柏舉吳人五戰而遂入郢  
則以子常之貪也奪唐蔡而殺卻宛以不和其人民  
不然雖子胥之智無所聘之也先楚之智者其惟蒍  
賈乎僖公二十七年楚子將圍宋使子文治兵于睢  
終朝而畢不戮一人子玉復治兵于蔞終日而畢鞭  
七人賈三人耳國老皆賀子文子文飲之酒蒍賈尚  
幼後至不賀子文問之曰不知所賀子之傳政於子

玉曰以靖國也靖諸內而敗諸外所獲幾何子玉剛而無禮不可以治民過三百乘其不能以入矣苟入而賀何後之有易曰負且乘致寇至負者小人之事也乘者君子之器也以小人之事乘君子之器則盜思奪之矣魯之三冢皆過三百乘而卒見奪于盜晉宋之六卿則自相盜也盜乘而盜奪之又何責焉

#### 章別章第四

子云夫禮者所以章疑別微以為民坊者也故貴賤有等衣服有別朝廷有位則民有所讓

莊公二十三年秋丹桓宮楹

二十四年春王三月刻桓宮楹

穀梁子曰禮天子諸侯黜堊大夫倉士黹丹楹非禮也天子之楹斲之礪之加密石馬諸侯之楹斲之礪之大夫斲之士斲本刻楹非正也夫人所以崇宗廟也取非禮非正加於宗廟以飾夫人非正也

左氏曰秋丹桓宮之楹春刻其楹皆非禮也御孫諫曰臣聞之儉德之共也侈惡之大也先君有共德而君納諸大惡無乃不可乎御孫所謂大惡何也謂其亂天子之典無所章別以教民僭也雉門兩觀則亦猶是也趙文子為室斲其椽而礪之張老少馬不謁而歸文子趨問之對曰天子之室斲其椽而礪之加密石馬諸侯礪之大夫斲之士首之備其物義也從其等禮也今子貴而忘義富而忘禮吾懼不免何敢以告文子歸令之勿礪也匠人請皆斲之文子止為後世之見之也其斲者仁者之為也其礪者不仁者之為也趙文子則庶乎章疑者矣



戊寅大夫宗婦覲用幣

此細事也而春秋謹識之御孫曰男贄大者玉帛小者禽鳥以章物也女贄不過榛栗棗脩以告虔也今男女同贄是無別也男女之別國之大節也而由夫人亂之無乃不可乎公羊子曰宗婦者何大夫之妻也穀梁子曰禮大夫不見夫人大夫國體也而行婦道惡之故謹而日之也夫大夫宗婦有異于夫人婦者乎別而又別之甚矣穀梁子之別也

襄公七年冬十月衛侯使孫林父來聘

左氏曰衛孫文子來聘且拜武子之言而尋孫桓子之盟也公登亦登叔孫穆子相趨進曰諸侯之會寡君未嘗後衛君今吾子不後寡君寡君未知所過吾子其少安孫子無詞亦無悛容穆叔曰孫子必亡為

臣而君過而不悛亡之本也詩曰退食自公委蛇委蛇謂從者也衡而委蛇必折有讓則從不讓則衡孫

文子衡

者也

號之會楚公子圍二人執戈先馬蔡公孫歸生與鄭罕虎見叔孫穆子穆子曰楚公子甚美不丈夫矣抑君也鄭子皮曰有執戈之前吾惑之蔡子家曰蒲宮有前不亦可乎穆子曰不然天子有虎賁習武訓也諸侯有旅賁禦災害也大夫有貳車備承事也士有陪乘告奔走也今大夫而設諸侯之服有其心矣夫服心之文也如龜馬灼其中必文于外若楚公子不為君必死不合諸侯矣

昭公十六年韓起聘于鄭鄭伯享之子產戒曰苟有位於朝無有不恪孔張後至立于客間執政禦之適客後又禦之適縣間客從而笑之事畢富子諫曰夫大國之人不可不慎也幾為之笑而不陵我我皆有

禮夫猶鄙我孔張失位吾子之恥也子產怒曰發命之不哀出令之不信刑之頗類獄之故紛會朝之不敬使命之不聽取陵於大國罷民而無功罪及而不  
知僑之恥也孔張君之昆孫子孔之後也執政之嗣也為嗣大夫承命以使周于諸侯立於朝而祀于家  
喪祭有職受脤歸脤具祭在廟已有著位世守其業而忘其所僑馬得恥之故為禮者無它修其坊而加  
讓焉若此而已駟氏之後有駟秦者富而侈嬖大夫也而常陳卿之車服于其庭鄭人惡而殺之國參曰  
詩云不解于位民之攸墜不守其位而能久者鮮矣書曰車服以庸車服者先王所以教讓也

魯哀公之末年公子荆之母嬖將以為夫人使宗人釁夏獻其禮對曰無之公怒曰女為宗司立夫人國之大禮也何故無之對曰周公及武公娶于薛孝惠娶于商自桓以下娶于齊此禮也則有若以妾為夫

人則固無其禮也公卒立之而以荆為太子國人始惡之故疑微之際不可不別也

文公二年八月丁卯大事于太廟躋僖公

定公八年冬從祀先公

公羊子曰從祀者何順事也文公逆祀去者三人定公順祀叛者五人言夫章疑別微之無人也文公二年夏父弗忌為宗伯尊僖公明言曰吾見新鬼大故鬼小先大後小順也躋聖賢明也明順禮也君子以為失禮禮無不順祀國之大事也而逆之可謂禮乎子雖齊聖不先父食故禹不先鯀湯不先契文武不先不啻宋祖帝乙鄭祖厲王猶尚祖也是以魯頌曰春秋匪解享祀不忒皇皇后帝皇祖后稷君子曰禮謂其后稷親而先帝也詩曰問我諸姑遂及伯姊君子曰禮謂其姊親而先姑也及定公八年季寤公鉏

極公山不狃皆不得志于季氏叔孫軌無寵于叔孫氏叔仲志不得志于魯故五人因陽虎陽虎欲去三桓以季寤更季氏以叔孫軌更武伯已更懿子冬十月順祀先公而祈焉辛卯禘于僖廟然則是五叛者之為順祀也而曰叛者五人何也曰祀者非五人也祈者五人也祀則有公三卿焉而五人祈其從違曰是衆與我也然則昭公之先已祀乎曰安得不祀葬必有主主必祔于廟不廟則必自為廟也然則墓道之南不幾于別廟與曰別廟必書以煬宮武宮而猶書之亦未有置于毀廟者也以榮駕鵠之言中于忤心于主祔亦可以已也且是孟懿子則亦為政矣生事葬祭則亦嘗聞之矣孟懿子以是明禮而五人者以是明亂然則是大禮也而不書禘事與曰何也曰略之也季孫以侵衛初歸陽虎志在于亂孟氏築室於門外其于卜日誼士皆略之矣夫徒有其舉馬而於亂終辛卯壬辰則無所置日也置日則無所置蒲

圓者矣無所別之而猶以別名故聖人貴別也

盍旦章第五

子云天無二日土無二王家無二主尊無二上示民有君臣之別也春秋不稱楚越之王喪禮君不稱天大夫不稱君恐民之感也詩云相彼盍旦尚猶患之

桓公元年春王正月公即位

桓公二年春王正月戊申宋督弑其君與夷

桓公十年春王正月

桓公十八年春王正月公會齊侯于櫟

公與夫人遂如齊

穀梁子曰桓無王其曰王何也謹始也其曰無王何也桓弟弑凡臣弑君天子不能定諸侯不能救百姓不能去以為無王之道遂可以至焉耳然則元年之王以為謹始十年之王以為舉中末年之王以為謹終與曰固也固則二百四十二年之中其無王者九十有九何也曰歷法之過也有春而以王治之亦有春而不以王治之治者須不治者不須亦不可知也然則其為誅弑道者何也曰雷霆之憲時當焉耳天道之不察察也使人間值之而号然以思然則毛伯之錫文公稱王以天榮叔之錫桓公去天稱王何也曰桓有罪不討無功足錄生而宥之沒而錫之謂可以省焉耳然則春秋之于王無貶與曰王也何貶之

有家父求車而猶曰天王故繻葛之戰河陽之名春秋之所諱也叔帶子朝之難而王不以是去天則終無所去之矣至于王猛而後書名春秋之義盖于是絕也然則春秋不以天治王以王治天下與曰小察者大迷體大者不細春秋之所貴者在子以霸尊王不以王與霸在于以人與楚以子命吳以地呼越也至于越而絕矣春秋之所不絕者以一日命天以一王命天下

僖公九年夏公會宰周公齊侯宋子衛侯鄭伯許男

曹伯于葵丘

左氏曰夏會于葵丘尋盟且修好禮也王使宰孔賜齊侯胙曰天子有事于文武使孔賜伯舅胙齊侯將下拜孔曰且有後命天子使孔曰以伯舅耄老加勞賜一級無下拜對曰天威不遠顔咫尺小白余敢貪



天子之命無下拜恐隕越于下以遺天子羞敢不下拜下拜登受齊侯雖未朝王則猶知有王也下拜登受是齊桓之正也

僖公二十八年冬公會晉侯齊侯宋公蔡侯鄭伯陳子莒子邾子秦人于溫

天王狩于河陽

公朝于王所

左氏曰是會也晉侯召王以諸侯見且使王狩仲尼曰以臣召君不可以訓故書曰天王狩于河陽言非其地也公羊子曰曷為不言公如京師天子在是也天子在是則曷為不言天子在是不與致天子也國

語曰晉文公既定襄王于郊王勞之以地辭請隧馬  
王弗許曰昔我先王之有天下也規方千里以為甸  
服以供上帝山川百神之祀以備百姓兆民之用以  
待不庭不虞之患其餘以均分公侯伯子男使各有  
寧宇以順及天地無逢其災害先王豈有賴焉內官  
不過九御外官不過九品足以供給神祇而已豈敢  
厭縱其耳目心腹以亂百度亦唯是死生之服物采  
章以臨長百姓而輕重布之王何異之有今天降禍  
災于周室余一人僅亦守府又不佞以勤叔父而班  
先王之生物以賞私德叔父實應且憎以非余一人  
余一人豈敢有愛也先民有言曰改玉改步叔父若  
能光昭大德更姓改物以創制天下自顯庸也而縮  
取構物以鎮撫百姓余一人其流辟於裔土何辭之  
與有若猶是姬姓也尚將列為公侯以復先王之職  
大物其未可改也叔父其茂昭明德物將自至余敢  
以私勞變前之大章以忝天下其若先王與百姓何

何政令之為也。若不然，叔父有地而陸焉，予安能知之？文公遂不敢請受地而還。文公于是若不知有王矣，而猶知有王，是晉文之譎也。

### 宣公三年春楚子伐陸渾之戎

### 夏楚人侵鄭

左氏曰：楚子伐陸渾之戎，遂至于雒，觀兵于周疆。定王使王孫滿勞楚子。楚子問鼎之大小、輕重。馬對曰：在德不在鼎。昔夏之方有德也，遠方圖物，貢金九牧，鑄鼎象物，百物而為之，儻使民知神姦，入川澤山林，不逢不若。螭魅罔兩，莫能逢之。用能協于上下，以承天休。桀有昏德，鼎遷于商，載祀六百。商紂暴虐，鼎遷于周。德之休明，雖小重也；其姦回昏亂，雖大輕也。天祚明德，有所底止。成王定鼎于郊，邠卜世三十，卜年

七百天所命也周德雖衰天命未改鼎之輕重未可問也及後楚子虔又欲求鼎于周而驟没于乾谿故楚子可謂知欲而不知命也若宋襄公亦是也

僖公十六年春王正月戊申朔隕石于宋五是月六

鷓退飛過宋都

周內史叔興聘于宋宋襄公問馮曰是何祥也吉凶馮在對曰今茲魯多大喪明年齊有亂君將得諸侯而不終退而告人曰是陰陽之事非吉凶所生也夫是亦所謂命也莫為而為之莫致而致之亦曰修德而已矣舍德而力力則不競以退以隕亡王之後而欲爭中夏之諸侯是猶有隧鼎之心也孟之會公子魚曰禍其在此乎君欲已甚何以堪之于是楚執宋公以伐宋是命之不足以坊欲者也

哀公七年夏公會吳于郕

左氏曰會于郕吳來徵百牢于服景伯對曰先王未之有也吳人曰宋百牢我魯不可以後宋且魯牢晉大夫過十吳王百牢不亦可乎景伯曰昔趙鞅貪而棄禮以大國懼敝邑故敝邑十一牢之君若以禮命諸侯則有數矣若亦棄禮則有淫者矣周之王也制禮上物不過十二以為天之六數也今棄周禮而必曰百牢亦唯執事吳人弗聽景伯曰吳將亡矣棄天而肯本不與必棄疾於我乃與之故禮以坊德刑以坊淫命以坊欲自桓文以下皆末之有也譬之盍旦其以昏號畫者也

然則春秋楚子書卒不書葬惡其僭也天王之崩或志或否或葬或不葬何也曰以責魯也穀梁子聞之沈子魯人有喪周人弔周人有喪魯人不弔周人曰固吾臣也使人可也魯人曰吾君也親之者也使大

夫則不可也故周人弔魯人不弔是何為者也曰言夫周魯之并有喪者也周魯并有喪周通四海得以卹下弔於魯魯守一境不得以越殯弔於君謂其君親往也君皆親往而周匱矣周匱則必以喪謝諸侯故天子遣人以問諸侯諸侯不得越境以赴天子故天子有喪諸侯就其朝廟為位而哭斬衰置杖七月而除之以功衰治三年之喪然後即吉天子葬望道而哭哭而後相弔也相弔而後治事故遇天子之崩葬而或以禮或不以禮則書不書異文變質各相副矣春秋十有二王桓襄匡簡景禮問及于諸侯魯皆為之禮自崩而葬無逸禮者春秋曰是知有王也為之書王猶之書禮也平惠定靈志崩不志葬其葬禮則已泯矣葬禮之泯自隱公始也

隱公三年春三月庚戌天王崩

秋武氏子來求賻

求賻則且葬也已七月矣而魯賻不至不得曰討而得曰求求而得之亦不得曰禮也故平王崩而不葬僖公八年冬十有二月丁未天王崩

九年夏公會宰周公齊侯宋子衛侯鄭伯許男曹伯于葵丘

是七月矣宰不得蒞事于周則諸侯不得就哭于位聞其日矣致壇而哀哀而後行事不然不書故惠王崩而不葬謂有盟主存焉責盟主而不責魯

成公五年冬十有一月己酉天王崩

六年秋仲孫蔑叔孫僑如帥師侵宋

襄公二十有八年冬十有二月甲寅天王崩

明年夏秋以晉命城祀是皆責盟主也然而伐宋城  
祀未害于致葬禮也則魯與有過馬曰先後之異時  
也魯不得盡禮馬魯不得盡禮則桓王之七載猶且  
書之故曰魯與有過也然則魯如之何曰魯即不奔  
王喪猶以袞墨  
守於周公之廟

莊公十二年莊王崩春王三月紀叔姬之歸則猶書  
王也以王表月而不以崩表王于是夏四月無事奈  
何其無天王之事也夫獨為  
責王者乎春秋無責王者也

莊公十七年僖王崩五年之間有兩王喪霸役未起  
戎慝未作宗國輯寧京師晏然于是四時無事有它



國之細事焉何為其  
無天王之大事也

文公十四年頃王崩春秋三沒王不廢王月五月則  
不廢王崩則廢之謂是佚簡也于是則我多事矣春  
伐邾夏盟于新城秋至自會冬齊執單伯然猶未可  
以廢天王之事也故春秋之責魯莊公甚于其責文  
公也詩人之誦魯莊公甚于其誦齊襄公也父子之  
道衰則君臣之誼絕猶之月見于晝則書日可廢也  
書日不可廢亦  
無所見日矣

然則楚赴晉喪又執楚喪而不可以奔天王之喪何  
也曰未之聞也夫子出封于外非王命不赴京師朝  
聘以時值有大故從事于羣公之後奔喪之禮則未  
之學也列國聞喪則卿士大夫書之矣卿士大夫奔  
走於蚤翼之下則未之敵書也執紼之及晉桃荊之  
及楚則不得已也然則諸侯之歸楚如何曰六王二

公則楚已擇取之矣鄭蔡陳許不乘其車者則猶在諸侯之位也猶在諸侯之位則王之如何曰舉子男見公之禮就降階馬而已滅國之後託于臣妾則典籍去之矣

定公四年三月公會劉子晉侯宋公蔡侯衛侯陳子鄭伯許男曹伯莒子邾子邾子子子滕子薛伯杞伯小邾子齊國夏于召陵侵楚

十四年二月楚公子結滅頓

十五年二月辛丑楚子滅胡

哀公四年夏晉人執戎蠻子赤歸于楚

是去台陵之會甫踰十載而盟主叛盟歸命江漢何也曰韓魏趙氏將分公室而釋憾于楚以弱天下之諸侯左氏傳曰楚人既克夷虎乃謀北方左司馬販申公壽餘葉公諸梁致蔡于負函致方城之外于繒闕曰吳將沂江入郢將奔命焉為一昔之期襲梁及霍單浮餘圍戎蠻氏蠻氏潰蠻子赤奔晉陰地司馬起豐析與狄戎以臨上雒左師軍于苑和右師軍于倉野使謂陰地大夫士蔑曰晉楚有盟好惡同之若將不廢寡君之顧也不然將通于少習以聽命士蔑請諸趙孟趙孟曰晉國未寧焉能惡楚必速與之士蔑乃致九州之戎將裂田與蠻子而城之且將為之卜蠻子聽卜遂執之與其五大夫以界楚師于三戶司馬販致邑立宗馬誘其遺民盡俘以歸晉之不競則不自是始也自厥愆之會始也厥愆之會八國救蔡不遠而歸以為荀范不睦內變方蘊守士變之智以待楚斃無責焉耳於是趙孟為政韓魏從之而效

楚之趣誘人之君以歸命于楚夫非竊國之盜而誰復為之乎穀梁子曰其言歸于楚何曰辟伯晉而京師楚也京師楚則遂王楚矣  
蓋中國之王楚自是始也

昭公十一年夏四月丁巳楚子虔誘蔡侯般殺之于

申

十六年春楚子誘戎蠻子殺之是蓋稱誘也晉誘蠻子赤而不曰誘何也曰歸重於執執重於誘舉重馬耳然則不書趙鞅士蔑而曰晉人何也曰歸楚者非獨趙鞅也非獨趙鞅則將盡列國而人之何獨晉人也故趙鞅者所謂盍旦之鳥也

然則召陵始會齊桓公不卻江黃亦不救江黃召陵終會趙孟不卻胡頻亦不救胡頻夫猶有霸者之意

乎曰是荀寅之意也荀寅死而後趙孟用事趙孟之  
誘執蠻子甚於荀寅之取貨于蔡也取貨于蔡而中  
國叛誘執蠻子而蕃服叛中國與蕃服皆叛而楚始  
坐王楚坐王而三晉始分故春秋誅楚之意則將盡  
於此也然則晉納蠻子而楚破武關以取陰地晉將  
如何曰楚之畏吳猶晉之畏楚也吳能以柏舉入郢  
楚不能以少習入晉然且君子不以勢易德不以險易信

### 哀公六年秋七月庚寅楚子軫卒

左氏曰楚子在城父將救陳卜戰不吉卜退不吉王  
曰然則死也再敗楚師不如死棄盟逃讎不如死死  
一也其死讎乎命公子申為王不可則命公子結亦不  
可則命公子啓五辭而後許將戰楚子有疾庚寅攻  
大冥卒于城父子閻退曰君王舍其子而讓羣臣敢  
忘君乎從君之命順也立君之子亦順也與子西子

期謀潛師閉塗立越女之子章而後還是歲也有雲如衆赤鳥夾日以飛三日楚子使問于周太史周太史曰其當王身乎若禳之可移于令尹司馬楚子曰除腹心之疾以寘諸股肱何益不穀不有大過天其天諸有罪受罰又馬移之遂弗禳也初楚昭王有疾卜曰河為祟王弗祭大夫請祭諸郊王曰三代命祀祭不越望江漢睢漳楚之望也禍福之至不是過也不穀雖不德河非所獲罪也遂弗祭孔子曰楚子知天道矣其不失國也宜哉夏書曰維彼陶唐帥彼天常有此冀方今失其行亂其紀綱乃滅而亡又曰允出茲在茲由已率常可矣夫夫子亦與楚子乎夫子之與楚子謂楚之不郊也楚之不郊猶盜藏而舍其帷幕也杞宋魯之郊猶主饋之用祭器也然則赤鳥夾日之祥何也曰是月也其周正申酉七八月之間乎日在於翼軫鶉尾之墟赤眚徙之其國有火亦有大喪爰及大兵于是吳入楚楚子歿于城父則謂是

占也然則齊景夢與二日搏而不勝不謂吳楚乎曰  
齊景之夢不如呂錡之式也夫齊景者亦猶之盍且  
也者

### 遠害章第六

子云君不與同姓同車與異姓同車不同服示民不嫌  
也以此坊民民猶得同姓以弑其君

隱公十年夏翬帥師會齊人鄭人伐宋

左氏曰先期也公羊子曰此公子翬也何以不稱公  
子翬曷為貶隱之罪人也故終隱之篇貶也先是四  
年秋書翬帥師左氏曰疾之也貶之疾之桓三年秋  
公子翬如齊逆女則不去其公子何也以隱而疾之

疾其仇以桓而親之親其故夫以公子而逆女異于公子而同車者乎甚矣魯之不嫌也不嫌不嚴故周公之後以內篡多聞

莊公三十二年秋七月癸巳公子牙卒

公羊子曰何以不稱弟殺也殺則曷為不言刺為季子諱殺也曷為為季子諱殺季子之過惡也不以國獄緣季子之心而為之諱季子之過惡奈何莊公病將死以病召季子季子至而授之以國政曰寡人即不起將焉致魯國季子曰般也存君何憂馬公曰容得是乎牙謂我曰魯一生一及君已知之矣慶父也存季子曰夫何敢是將為亂乎夫何敢俄而牙弑械成季子和藥而飲之曰公子從吾言而飲此可以無為天下戮笑必有後于魯國牙從其言而飲之無僂氏至于王堤而死



八月癸亥公薨於路寢

冬十月己未子般卒公子慶父如齊

閔公元年春王正月

公羊子曰公何以不言即位繼弒君不言即位孰繼子般也孰弒子般慶父也殺公子牙今將爾季子不免慶父弒君何以不誅將而不免過惡也既而不可及獄有所歸不探其情親親之道也惡乎歸獄歸獄於僕人鄧扈樂鄧扈樂者即左氏所謂圍人犖也甚哉公羊子之恕也獄有所歸而首禍者可免乎夫季友不能誅兩公子也季友不能誅兩公子而春秋兩釋之一曰公子牙二曰公子慶父何也曰弒者之不去其公子也以為藉也曰微公子不弒矣至於公子牙聖人猶有輕典曰已服之矣具其時日若可告

於廟者然是周法所宥同姓也

文公十有八年秋公子遂叔孫得臣如齊

冬十月子卒

夫人姜氏歸于齊

季孫行父如齊

左氏曰文公二妃敬嬴生宣公敬嬴嬖而私事襄仲宣公長而屬諸襄仲欲立之惠伯不可仲見于齊侯而請之齊侯新立而欲親魯許之冬十月仲殺惡及視而立宣公書曰子卒諱之也仲以君命名惠伯其宰公冉務人止之惠伯曰死君命可也公冉務人曰若君命可死非君命何聽惠伯弗止乃入仲殺而埋

之馬矢之中是仲也殺一君一公子一大夫而春秋書之若無害于國者又何以正天下曰春秋亦有所諱也春秋不諱齊莒而納魯君臣于齊莒之中夏五月戊戌齊人弑其君商人冬莒弑其君庶其夫以公子遂叔孫得臣為異于邠獸閭職者乎抑以季孫行父為異於莒太子僕者乎行父之異于莒僕則有以自白也遂得臣之異于獸職則無以自白也聖人謂吾不樂以子赤與商人庶其同視也使遂得臣行父與齊莒同視馬是亦行父之所深耻也然則罪行父者何也以季友之所罪子牙者罪襄仲則不得以季友之所恕慶父者恕行父也

宣公八年夏六月辛巳有事于太廟仲遂卒于垂

壬午猶繹萬入去籥

公羊子曰仲遂者何公子遂也何以不稱公子貶曷  
貶為弑子亦貶然則曷為不於弑馬貶于文則無罪  
于子則無年穀梁子曰為若反命而後卒也此公子  
也其曰仲何也疏之也何為疏之是不卒者也不疏  
則無用見其不卒也其卒之何也以讓乎桓也其讓  
桓何曰聞大夫之喪則去樂卒事夫穀梁子則未聞  
夫奚斯子產之誼也共仲未死而奚斯哭之子皙未  
死而子產數之令其速死仲遂之反于黃是可數矣  
惜乎魯之無子產也

然則弑君之坊專為同姓者乎曰春秋之貴者則皆  
同姓也曰是專為魯發乎曰列國諸侯有弑其君者  
曰薨曰卒或地或不地則必以魯為詞魯之六世弑  
兩君兩子則與齊楚比烈也或曰是為公孫無知楚  
子于子皙發與齊僖公之母弟曰夷仲年生公孫無  
知有寵于僖公衣服禮秩如嫡襄公紉之無知遂作

亂弑襄公楚子審無冢嫡有寵子五人無適立焉乃  
徧以璧見於羣望與已姬埋璧于太室之庭使五人  
齋齒而入拜子昭跨之虔肘加焉子干子皙遠之棄  
疾抱而入拜皆當璧楚子不定故自子昭而下遞相  
弑也然則誰始為之其晉獻公乎獻公之初未廢申  
生也使士蒍為重耳夷吾築蒲與屈不慎寘薪焉公  
使讓之士蒍稽首對曰臣聞之無喪而戚憂必讎馬  
無戎而城讎必保焉寇讎之保又何慎焉詩云懷德  
惟寧宗子維城君其修德而固宗子何城如之三年  
將尋師焉馬用慎退而賦曰狐裘尅茸一國三公吾  
誰適從至於奚齊卓子而為公者衆矣故同姓之別  
不可不慎也以齊桓公之明管仲之賢也不能立一  
公子卒幾不得殯殯幾不得葬禍亂相尋自武孟而  
後孝昭懿惠五世而後定亦惟是輿服相似以嫡齒  
年之故也然則事有近於此者乎曰有之是在臧武  
仲之立季悼子也季武子欲立悼子以公彌之長也

不敢主問於臧武仲武仲曰吾能立之乃請諸大夫  
適獻客命重席新罇降階而逆悼子及旅獻乃召公  
彌與之齒武仲以是見愛于季氏見斥于國人然幸  
也而不至於弑楚昭王之奔隨也子西為王輿服以  
保路國於胥洩聞王所在而後從王及由余之城麋  
也子西問大小高厚馬由余皆曰不知子西怒曰不  
能如辭城之不知又何知馬由余曰固辭之矣而吾  
使也人各有能有不能王遇盜于雲中予受其戈其  
所猶在袒而示之背曰此予所能也若胥洩之事予  
亦弗能也故為假輿服以弭亂者猶假輿服以招寵  
也臧紇假罇席以亂嫡庶之序子西假輿服以乘危  
亂之釁是仲尼之所深鄙也詩曰鳴鳩在桑其子七  
兮淑人君子其儀一兮  
一者有上下之謂也

人浮於食章第七

子云君子辭貴不辭賤辭富不辭貧則亂益亡故君子  
與其使食浮於人也寧使人浮於食

桓公十有一年秋九月宋人執鄭祭仲

突歸于鄭

鄭忽出奔衛

鄭忽者鄭昭公也為鄭世子突者何厲公也宋人欲  
立厲公執祭仲而逐忽忽不能讓又不能遂卒以廢  
死君子傷之左氏曰我公之未昏于齊也齊侯欲以  
文姜妻鄭太子忽太子忽辭人問其故太子曰人各  
有耦齊大非耦也詩云自求多福在我而已大國何  
為君子曰善自為謀及其敗戎師也齊侯又欲妻之

固辭人問其故太子曰無事於齊吾猶不敢今以君命奔齊之急而受室以歸是以師昏也民其謂我何遂辭諸鄭伯方子忽之辭也祭仲曰必取之君多內寵子無大援將不立三公子皆君也弗從而卒以失國齊人所刺狡童也桓公十七年高渠彌弑昭公而立公子亶其明年夏四月丙子公薨于齊丁酉公之喪至自齊夫與其亂而離于禮毋寧禮而離于亂乎以鄭昭公之賢也失援而為世所詆譏是慶父襄仲所歸命于齊定哀所入楚入越也將謂求繫得繫者之可謂智乎

襄公二十二年九月鄭公孫黑肱有疾歸邑于公召室老宗人立段而使黜官薄祭祭以特羊殷以少牢足以共祀盡歸其餘邑曰吾聞之生于亂世貴而能貧民無求焉可以後亡敬共事君與二三子生在敬戒不在富也已已伯張卒君子曰善哉詩曰慎爾侯度用戒不虞鄭子張有焉



楚之殺子南也以觀起之富也。遂子馮復為令尹，有寵于子馮者，八人皆無祿而多馬。他日朝，與申叔豫言，弗應而退。徙之入於人中，又徙之，遂歸。退朝見之，曰：「子三困我于朝，吾懼不敢不見，吾過子，姑告我何疾我也。」對曰：「吾懼不免馬，何故？」對曰：「昔觀起有寵于子南，子南得罪，觀起車裂，何故？」不懼。遂子自御而歸，不能當道，至謂八人者曰：「吾見申叔，夫子所謂生死而肉骨也。愛我者如夫子，則可不然，請止辭。」八人者而後王安之。

崔氏之亂，喪羣公子，故鉏在魯，叔孫還在燕，賈在句瀆，之丘及慶氏亡，皆召之，具羈用而反其邑。馬與晏子邶殿，其鄙六十，弗受。子尾曰：「富人之所欲也，何獨弗欲？」對曰：「慶氏之邑足欲，故亡吾邑，不足欲也。益之以邶殿，乃足欲，足欲亡無日矣。在外不得宰吾一邑，不受邶殿，非惡富也，恐失富也。且夫富如布帛之有

幅馬為之制度使無遷也民生厚而用利於是正德以幅之使無黜嫚謂之幅利利過則敗吾不敢貪多所謂幅也于是子雅從之辭多受少子尾受而稍致之公公以為忠

襄公二十七年衛殺其大夫甯喜

衛侯之弟鱣出奔晉

左氏曰衛甯喜專公患之公孫免餘請殺之公曰微甯子不及此吾與之盟矣事未可知祇成惡名止也公孫免餘請私討之敗又攻甯氏殺之子鮮曰逐我者出納我者死不亦難乎且鱣實使之遂出奔晉公使止之不可託於木門不鄉衛國而坐公賞免餘邑六十辭曰唯卿備百邑臣六十矣下有上祿亂也臣弗敢聞且甯子唯多邑故死臣懼死之速及也公固與之受其半使為師辭曰大叔儀不貳能贊大事君

其命之乃使丈子為卿故辭貴受賤辭富受貧公孫  
免餘有馮夫公孫免餘聞之晏子者乎抑聞之管子  
者乎僖公十二年管夷吾平戎於王王以上卿之禮  
饗管仲管仲辭曰臣賤有司也有天子之二守國高  
在若節春秋來承王命何以禮焉王曰舅氏余嘉乃  
勲應乃懿德謂督不忘往踐乃職無逆朕命管仲乃  
受下卿之禮而還故管  
子晏子則可以弭亂矣

穀梁子曰專喜之徒也專為喜之徒何也已雖急納  
其兄與人之臣謀弑其君是亦弑君者也其曰弟何  
也專有是信者君賂不入乎喜而殺喜是君不直乎  
喜也故出奔晉織約邯鄲終身不言衛公羊子曰甯  
氏之將再納獻公也公必使公子鱣約之公子鱣不  
可獻公怒以鱣與逐已也不得已而約之已約歸殺  
甯喜公子鱣乃挈妻子而去之將濟于河盟曰盱履  
衛地食衛粟者昧雉彼視然則子鮮之誼謂近於叔

肝者乎謂近於季札者乎三公子者皆織屨灌園自食其食然而叔肝不與于亂子札遺亂子鮮則與於亂也夫子鮮其猶之公冶者與

### 襄公二十九年夏五月公至自楚

左氏曰公還及方城季氏取卞使公治問璽書追而與之曰聞守卞者將叛臣帥徒以討既得之矣取告公治致使而退及舍而後聞取卞公曰欲之而言叛祇見疏也公謂公冶曰吾可以入乎對曰君實有國誰敢違君公與公冶冕服固辭強之乃受公欲無入榮成伯賦式微乃入公治致其邑于季氏終不入季氏家曰欺其君何必使予季孫見之則言季氏不見則不言季氏及疾聚其臣曰我死必無以冕服斂非德賞也且無使季氏葬我故如公孫免餘

公子鮮公冶者亦可謂人淳于食矣

貴讓章第八

子云觴酒豆肉讓而受惡民猶犯齒衽席之上讓而坐  
下民猶犯貴朝廷之位讓而就賤民猶犯君詩云民之  
無良相怨一方受爵不讓至于已斯亡

僖公二十五年晉侯朝王不書謂其請隧也公問元  
帥於趙衰對曰卻縠可行年五十矣守學彌惇夫先  
王之法志德義之府也德義生民之本也能惇篤者  
不忘百姓也請使卻縠公從之公使趙衰為卿辭曰  
樂枝貞慎先軫有謀胥臣多聞皆可以為輔臣弗若  
也乃使樂枝將下軍先軫佐之卻縠卒先軫代之胥  
臣佐下軍既又使趙衰為卿辭曰夫三德者偃之出  
也以德紀民其章大矣不可廢也使狐偃為卿辭曰

毛之知賢於臣其齒又長毛也不在位不敢聞命乃使狐毛將上軍狐偃佐之狐毛卒又使趙衰代之辭曰城濮之役先且居之佐君也善軍伐有賞善君有賞能其官有賞且居有三賞不可廢也且臣之倫箕鄭胥嬰先都在乃使先且居將上軍公曰趙衰三讓其所讓者皆社稷之衛也廢讓是廢德也以趙衰之故蒐於清原作五軍使趙衰將新上軍箕鄭佐之胥嬰將新下軍先都佐之故晉臣多讓則趙文子之教也虞書曰溫恭克讓又曰汝唯不伐汝唯不矜其趙文子之謂與

成公十三年三月公如京師

公羊子曰鑿行也鑿行奈何不敢過天子也然則必朝王矣而不曰朝王何也畧之也諸侯之志在於伐秦鑿而入之非合也公將朝叔孫僑如先聘且告見王孫說與之語說言於王曰魯叔孫之來也必有異

馬其幣薄而言治殆請之也若請之必欲賜也且其狀方工而銳下宜觸冒人王其勿賜聖人之施舍也議之其喜怒取與也議之不主寬惠不主猛毅德義而已王私問諸魯果請之也王遂不賜禮如行人及魯侯至仲孫蔑為介王孫說與之語好讓王厚賂之故曰讓賢於請先是僖公三十二年秦師將襲鄭過周北門左右免胄而下超乘者三百乘王孫滿尚幼觀之言於王曰秦師必有適王曰何故對曰師輕而驕輕則寡謀驕則無禮無禮則脫寡謀自陷入險而脫能無敗乎既而師敗於殽是讓之賢於勇也晉既克楚于鄢使卻至告慶于周見召桓公與之語以晉國之克也已實謀之微我晉不戰矣欒范不欲我則強之戰而勝是吾力也吾有三伐必佐新軍而升為政單襄公曰人有言曰兵在其頸其卻至之謂乎君子不自稱也非以讓也惡其蓋人也夫人性陵上者也不可蓋也求蓋人其抑下滋甚故聖人貴

讓且諶曰獸惡其綱民惡其上書曰民可近也而不可上也禮獻必三讓聖人知民之不可加也故王天下者必先諸民今至在七人之下而欲上之是求蓋七人也其亦有七怨怨在小醜猶不可堪况侈卿乎其何以待之晉之克也天有惡于楚也故傲之以晉而卻至佻天以為已力不亦難乎以吾觀之兵在其頸不可久也明年卻至歸不免于難受爵不讓卻至之謂也

襄公十三年晉荀罃士魴卒晉侯蒐于綿上以治兵使士匄將中軍辭曰伯游長昔臣習于知伯是以佐之非能賢也請從伯游于是荀偃將中軍士匄佐之使韓起將上軍辭以趙武又使欒黶辭曰臣不如韓起韓起願上趙武君其聽之于是趙武將上軍韓起佐之欒黶將下軍魏絳佐之新軍無帥晉侯難其人使其什史率卒乘以從于下軍禮也君子曰讓禮之主也范宣子讓其下皆讓欒黶為汰弗敢違也其貴



讓之謂乎然則晉之讓孰始之曰自趙姬杜祁始之  
趙姬適文子生三子請迎叔隗子餘辭姬曰得寵而  
忘舊何以使人固請許之叔隗與盾來姬以盾為才  
固請於公以為嫡子而同括嬰下之以叔隗為內子  
而已下之杜祁者文公之次妃以偁姑有子讓偁姑  
而上之及季隗來又讓季隗故班在四是生公子雍  
故晉人之讓亦文公之教也而教  
先自內母亦鑒于驪氏之禍乎

靡笄之役卻獻子師勝而反范文子後入武子曰變  
乎女知吾望女也乎對曰夫師卻子之師也其事臧  
若先則恐國人之屬耳目於我也故不敢武子曰吾  
知免夫既見于公公謂卻獻子曰子之力也夫對曰  
克也以君命命三軍之士三軍之士用命克也何力  
之有范文子見公曰子之力也夫對曰變也受命於  
中軍以命上軍之士上軍之士用命變也何力之有  
欒武子見公曰子之力也夫對曰書也受命於上軍

以命下軍之士下軍之士用命書也何力之有馬甚矣晉軍之和也非讓無和蓋自鄢陵而衰矣綿上再霸則晉悼公之力也微晉悼公雖范宣子無以率其下

襄公二十四年晉平公嬖程鄭使佐下軍鄭行人公孫揮如晉聘程鄭問馬曰敢問降階何由子羽不能對歸以語然明然明曰是將死矣不然將士貴而知懼懼而思降乃得其階下人而已又何問馬夫既登而求降階者知人也不在程鄭非死必亡甚矣子羽之訥也為階者所以教讓也閔予之頌曰念茲皇祖陟降庭止又曰紹庭上下陟降厥家又曰無曰高高在上陟降厥士日監在兹是周成王之讓也

### 昭公十年夏齊樂施來奔

左氏曰齊惠樂高氏皆嗜酒信內多怨疆于陳鮑氏而惡之陳鮑方睦遂伐樂高氏樂施高疆來奔陳鮑

分其室晏子謂桓子必致諸公讓德之本也讓之謂懿德凡有血氣皆有爭心故利不可彊思義為愈義利之本也蘊利生孽姑使無蘊乎可以滋長桓子盡致於公而請老於莒召子山子商子周而反其邑反子城子公孫捷而皆益其祿國之貧約孤寡者私與之粟故晏子之讓分於桓子桓子之有齊國亦晏子之教也

晉人之執季文子也既歸聲伯往謝之卻犇欲與之邑弗受也歸鮑國謂之曰子何辭苦成叔之邑欲信讓耶抑知其不可乎對曰吾聞之不厚其棟不能任重重莫如國棟莫如德夫苦成叔家欲任兩國而無大德其不存也亡無日矣譬之如疾子恐易焉苦成氏有三七少德而多寵位下而欲上政無大功而欲大祿皆怨府也其君驕而多私勝敵而歸必立新家立新家不困民不能去舊因民非多怨無所始為怨三府可為

多矣其身之不定安能定人鮑國曰信夫吾信不若子鮑氏有譽吾不圖矣今子圖遠以讓邑必常立矣故聲伯者魯之良也以讓故寡怨

作讓章第九

子云君子貴人而賤已先人而後已則民作讓故稱人之君曰君自稱其君曰寡君

昭公十有三年秋公會劉子晉侯齊侯宋公衛侯鄭伯曹伯莒子邾子滕子薛伯杞伯小邾子于平丘八月甲戌同盟于平丘

公不與盟

晉人執季孫意如以歸

公至自晉

冬十月公如晉至河乃復

十有四年春意如至自晉

左氏曰尊晉罪已也尊晉罪已禮也夫所謂貴人賤已者也已則不競而侵凌邾莒使瘠牛償于孤豚蒙幕之咎意如自取之然而義不及公也義不及公而數欲止公何也侵莒如楚者季孫之謀也晉既輕公則公必重季氏使晉執季氏而季氏愈得以操重於公終公之身五紉於晉而卒歸于季氏者取鄆貳楚

之謀也然當成公時亦五紘於晉而權不在季氏者何曰穆伯之累諸侯之所知也至於昭而衰矣以周公之孫車賦八百乘奔走晉楚或止或復若無異於臣妾者則亦無貴作讓矣鄭賦六百子產子皮相繼為晉而趙孟范獻不敢越其宮庭故貴人而賤已者大詞之事也先人而後已者威儀之事也必以力政尊命鎮撫其社稷則非自彊不可矣詩曰無競維人四方其訓之貴人賤已亦不可以終訓之道也晉綿上之蒐新軍乏帥悼公欲使張老為師辭曰臣不如魏絳夫絳之智能治大官其仁可以利公室不忘其勇不疚於刑其學不廢先人之職若在卿位內外必平且雞丘之會其官不犯而辭順不可不賞也公五命之固辭乃使佐魏絳于新軍又辭以為軍司馬故如張老可謂先人而後已者矣叔孫婁之聘於宋也桐門右師見之語卑宋大夫而賤司城氏昭子告其人曰右師其亡乎君子貴其身

而後能及人是以有禮今夫子卑其大夫而賤其宗是賤其身也能有禮乎無禮必亡禮貴人而賤已昭子曰貴其身而後能及人何也言夫貴已則不敢賤人者也以貴處人則人亦貴已以賤處人則已乃愈賤矣惜乎意如之賤邾人而愈以賤其身賤其身而徒以尊晉人也

韓獻子老使公族穆子受事於朝辭曰厲公之亂無忌備公族不能死臣聞之曰無功庸者不敢居高位今無忌知不能匡君使至於難仁不能救勇不能死敢辱君朝以奉韓宗請退也固辭不立悼公聞之曰難雖不能死君而能讓不可不賞也使掌公族大夫如韓無忌可謂善稱人過稱已者矣然而難乎其為過也過及通國可謂貴人而賤已者矣

襄公九年秦景公使士雅乞師於楚將以伐晉楚子許之子囊曰不可當今吾不能與晉爭晉君類能而

使之舉不失選官不易方其卿讓于善其大夫不失守其士競于教其庶人力于農穡商工皂隸不知遷業韓厥老矣知營稟馬而以為政范匄少于中行偃而上之使佐中軍韓起少於欒黶而欒黶士魴上之使佐工軍魏絳多功以趙武為賢而為之佐君明臣忠上讓下競當是時也晉不可敵事之而後可以楚之競也而不敢以競敵讓故道有賤已而已愈貴後已而已愈先者讓是也

襄公二十七年夏叔孫豹會晉趙武楚屈建蔡公孫歸生衛石惡陳孔奐鄭良霄許人曹人於宋

傳曰宋之會晉楚爭先晉人曰晉固為諸侯盟主未有先晉者也楚人曰子言晉楚正也若晉常先是楚弱也且晉楚狎主諸侯之盟久矣豈專在晉叔向謂趙孟曰諸侯歸晉之德只非歸其尸盟也子務德毋



爭先且諸侯盟小國固必有尸盟者楚為晉細不亦可乎乃先楚人書先晉故後之而得先宋之會是也  
號之會則亦由此也

### 僖公二十六年夏齊人伐我北鄙

左氏曰齊孝公伐我北鄙公使展喜犒師使受命于展禽齊侯未入竟展喜從之曰寡君聞君親舉玉趾將辱于敝邑使下臣犒執事齊侯曰魯人恐乎曰小人恐矣君子則否齊侯曰室如懸磬野無青草何恃而不恐對曰恃先王之命昔周公太公股肱周室夾輔成王成王勞之而賜之盟曰世世子孫無相害也載在盟府太師職之桓公是以糾合諸侯而謀其不協彌縫其缺而匡救其災昭舊職也及君即位諸侯之望曰其率桓之功我敝邑用不敢保聚白豈其嗣世九年而棄命廢職其若先君何君必不然齊侯乃

還甚矣展季之順也稱而不說直而不犯後而先賤而貴夫子所云其蓋謂此也夫先君之思蓋亦讓者之通辭也

僖公二十八年冬曹伯襄復歸于曹遂會諸侯圍許

左氏曰丁丑諸侯圍許晉侯有疾曹伯之豎侯孺貨莛史以曹為解曰齊桓為會而封異姓今君為會而滅同姓曹叔振鐸文之昭也先君唐叔武之穆也夫猶有先君之思焉或曰是子臧之辭也作讓之誼子臧有焉

昭公二年夏叔弓如晉

叔弓聘于晉報宣子也晉侯使郊勞辭曰寡君使弓來繼舊好固曰女無敢為賓徹命于執事敝邑宏矣

敢辱郊使請辭致館辭曰寡君命下臣來繼舊好好  
合使成臣之祿也敢辱大館叔向曰子叔子知禮哉  
吾聞之曰忠信禮之器也卑讓禮之宗也辭不忘國  
忠信也先國後已卑讓也詩曰敬慎威儀以近有德  
夫子近  
德矣

### 襄公八年晉侯使士匄來聘

左氏曰晉范宣子來聘且拜公之辱告將用師于鄭  
公享之宣子賦標有梅季武子曰誰敢哉譬諸草木  
寡君在君君之臭味也歡以承命何時之有武子賦  
角弓賓將出武子賦彤弓宣子曰城濮之役我先君  
文公獻功于衡雍受彤弓于襄王以為子孫藏匄  
也先君守官之嗣也敢不承命君子以為知禮

### 可託章第十

子云利祿先死者而後生者則民不借先亡者而後存者則民可以託詩云先君之思以畜寡人以此坊民猶借死而號無告

隱公八年三月鄭伯使宛來歸祊

左氏曰鄭伯請釋泰山之祀而祀周公以泰山之祊易許田三月鄭伯使宛來歸祊不祀泰山也夫是謂思先君者乎

庚寅我入祊

公羊子曰宛者何鄭之微者也邠者何鄭湯沐之邑也天子有事于泰山諸侯皆從泰山之下諸侯皆有

湯沐之邑馬其言入何難也其曰何亦難也其言我何言我者非獨我也齊亦欲之夫皆為利已而欲之則借死而市生者衆矣

### 桓公元年三月鄭伯以璧假許田

左氏曰公即位修好於鄭鄭人請復祀周公卒易許田公許之三月鄭伯以璧假許田為周公祊故也穀梁子曰假不言以非假也非假而曰假諱易地也禮天子在上諸侯不得以地相與也無田則無許可知矣不言許不與許也許田者魯朝宿之邑也邠者鄭伯之所受命祭泰山之邑也用見魯之不朝於周而鄭之不祀泰山也然則鄭將借生而魯將借死乎天子周公者諸侯所不得生死之也鄭借天子而使魯借周公是鄭伯之志也故鄭伯之不然以璧假田雖鄭人之可也是非以璧假田者也假魯云耳假魯

則可以載矣故鄭以繻葛戰於天子

桓公十一年秋七月葬鄭莊公

九月宋人執鄭祭仲

突歸于鄭

鄭忽出奔衛

左氏曰初祭封人仲足有寵于莊公莊公使為卿為公娶鄧曼生昭公故祭仲立之宋雍氏女于鄭莊公曰雍姑生厲公雍氏宗有寵於宋莊公故誘祭仲而執之曰不立突將死亦執厲公而求賂焉祭仲與宋人盟以厲公歸而立之祭仲之不可託也忘其君而惜其身誘於人而亂人之國如祭仲者其亦有思乎

公羊子曰權之所設舍死亡無所設行權有道自貶損以行權不害人以行權殺人以自生亡人以自存君子不為也祭仲僭死而自生僭亡而自存而公羊子然之何也曰探祭仲之思欲終與忽也而祭仲不能故祭仲猶之傅瑕也

### 僖公十年春晉里克弑其君卓及其大夫荀息

左氏曰初獻公之殺世子申生也使荀息傅奚齊公疾召荀息曰以是藐諸孤辱在大夫其若之何稽首而對曰臣竭其股肱之力加之以忠貞其濟君之靈也不濟則以死繼之及里克將殺奚齊先告荀息曰三怨將作秦晉輔之子將何如荀息曰將死之里克曰無益也荀叔曰吾與先君言矣不可以貳能欲復言而愛身乎雖無益也將焉辟之且人之欲善誰不如我我欲無貳而能謂人已乎冬十月里克殺奚齊

于次荀息將死之人曰不如立卓子而輔之荀息立卓子十一月里克又殺卓子荀息死之故里克之可託不如荀息之可託也

桓公十一年秋公會宋公于夫鍾

冬十二月公會宋公于闕

十二年公會宋公于虛

冬十一月公會宋公于龜

丙戌公會鄭伯盟于武父

十二月及鄭師伐宋戰于宋



十三年二月公會紀侯鄭伯及齊侯宋公衛人燕人  
戰齊師宋師衛師燕師敗績

十四年春正月公會鄭伯于曹

夏五月鄭伯使其弟語來盟

宋鄭之履何其錯也公之意皆與突而去忽去順而  
與逆無所罪之皆為借死而號無告然則其獨與宋  
何也宋既賂魯則鄭必賂宋部  
鼎之耗償于盧門魯無知焉耳

僖公十五年十有一月壬戌晉侯及秦伯戰于韓獲

晉侯

左氏曰晉侯之入也秦穆姬屬賈君馬且曰盡納羣公子晉侯恧於賈君又不納羣公子是以穆姬恧之晉侯許賂中大夫既而皆偕之賂秦以河外五城東盡虢略南及華山內及解梁城既而不與晉饑秦輸之粟秦饑晉閉之糴故秦伯伐晉是以敗于韓原天下之不可託有如晉惠公者

僖公二十八年春晉侯伐衛

衛侯出奔楚

六月衛侯鄭自楚復歸于衛

衛元咺出奔晉

冬晉人執衛侯歸之于京師

衛元咺自晉復歸于衛

三十年秋衛殺其大夫元咺

及公子瑕

衛侯鄭歸于衛

公羊子曰衛之禍文公為之也文公為之奈何文公逐衛侯而立叔武使人兄弟相疑放乎殺母弟者文公為之也然則春秋與衛侯乎曰衛侯出曰奔楚入曰自楚復歸何為與衛侯也曰與叔武乎曰不見叔武何為其與叔武也曰與元咺乎曰舉國殺之何為其與元咺也曰罪元咺乎曰不去其大夫終始曰衛曷為其罪之也然則其文錯然何也曰痛夫天下之先生而後死先存而後亡者衆也雖伯武亦未之免

也其出也不哀其入也不迓為晉所立而無復凡之心但曰有君矣使晉無所急於凡藉衛而以及以是為智者是春秋所痛也若宋目夷之守宋鄭公子班之謀鄭是也

晉人之迎公子雍也穆嬴日抱太子以啼於朝曰先君何罪其嗣亦何罪舍嫡嗣不立而外求君將焉寘此出朝則抱以適趙氏頓首于宣子曰先君奉此子也而屬諸子曰此子也才吾受子之賜不才吾唯子之怨今君雖終言猶在耳而棄之若何宣子與諸大夫皆患之乃背先蔑而立靈公以禦秦師先蔑奔秦士會從之方先蔑之使也荀林父止之曰太子猶在而外求君此必不行子以疾辭若何弗聽為賦板之三章又弗聽及亡荀伯盡送其帑及其器用於秦故如荀林父可以託矣趙盾幸而不為襄仲也襄使穆嬴哭而過市

宣公十八年冬十月壬戌公薨于路寢

歸父還自晉至筮遂奔齊

左氏曰公孫歸父以襄仲之立公也有寵欲去三桓以張公室與公謀而聘于晉欲以晉人去之冬公薨季文子言於朝曰使我殺嫡立庶以失大援者仲也夫臧宣叔怒曰當其時不能治也後之人何罪子欲去之許請去之遂逐東門氏子家還及筮壇帷復命於介既復命袒括髮即位哭三踊而出遂奔齊書曰歸父還自晉善之也公羊子曰還者何善辭也何善爾歸父使于晉還自晉至裡聞君薨家遣墀帷哭君成踊反命乎介自是走之齊夫以季孫行父居君之喪哭未就位帛未及賓而厲言以討仲氏是將討君乎抑以自討也穀梁子曰與人之子守父之殯捐殯而奔其父之使者是亦奔父也故偕死而號無告者季文

子之逐公孫  
歸父是也

襄公二年夏五月庚寅夫人姜氏薨

成姜也左氏曰齊姜薨初穆姜使擇美楨以自為櫬與頌琴季文子取以墓君子曰非禮也禮無所逆婦養姑者也虧姑以成婦逆莫大焉詩曰其維哲人告之話言順德之行季孫於是為不哲矣且姜氏君之妣也曰為酒為醴烝畀祖妣以洽百禮季孫何禮之有

襄公四年秋七月戊子夫人妣氏薨

左氏曰秋定妣薨不殯于廟無櫬不虞匠慶謂季文子曰子為正卿而小君之喪不成不終君也君長誰受其咎初季孫為已樹六楨于蒲圃東門之外匠慶請木季孫曰略諸匠慶用蒲圃之楨季孫不御君子

曰多行無禮必自及也夫季孫所謂先生而後死先存而後亡者乎然則穆姜之誼未絕乎曰文姜則亦未絕也穆姜何絕之有然則定姒不殯于廟無觀不虞而稱夫人何也曰無觀不虞者是行父之志非先君寡人之志也於是知魯之不與文子也借死而號無告是君子之所鄙也

襄公二十三年秋八月己卯仲孫速卒

冬十月乙亥臧孫紇出奔邾

左氏曰季武子無適子公彌長而悼子愛訪於申豐曰彌與紇吾皆愛之欲擇才而立之申豐不對歸將盡室而行他日又訪焉對曰若然將具版車而行乃止訪於臧紇臧紇曰飲我酒吾為子立之季氏乃飲大夫酒臧紇為客既獻臧孫命北面重席新樽潔之召悼子降逆之大夫皆起及旅而召公鉏使與之齒

季孫失色乃以公鉏為馬正愠而不出閔子馬見公鉏曰子無然禍福無門唯人所召為人子者患不孝不患無所敬恭父命何常之有若能孝敬富倍季氏可也姦回不軌禍倍下民可也公鉏然之敬共朝夕恪居官次季孫喜使飲已酒而以具往盡舍莩又出為公左宰季氏以是愛臧孫而孟孫惡之孟孫之御豐點謂公鉏曰孟氏未有後苟立羯也請讎臧氏孟莊子疾公鉏以羯請於季孫弗應已卯孟孫卒公鉏奉羯立于戶側季孫入哭而出曰孺子秩馬在公鉏曰羯在此矣季孫曰孺子長公鉏曰何長之有唯其才也且夫子之命也遂立羯秩奔邾臧孫入哭甚哀多涕出其御曰孟孫之惡子也而哀如是季孫若死其若之何臧孫曰季孫之愛我美疾也孟孫之惡我藥石也美疾不如惡石石猶生我疾之美其毒滋多孟孫死吾亡無日矣冬十月孟孫且葬孟氏之徒告季孫曰臧氏不使我葬將為亂臧氏聞戒甲而助除



季孫覿之信遂攻臧氏臧紇斬廐門之關而出據防  
而求立後魯人盟之曰毋如東門遂不聽公命殺適  
立庶又曰毋如叔孫僑如欲廢國常蕩覆公室季孫  
曰皆不至此乃盟臧氏曰毋或如臧孫紇千國之紀  
犯門斬關夫臧紇之罪則亦僭死而號無告也死孟  
孫而走孺子秩猶以多涕明智也是臧孫之思也

### 酌言章第十一

子云有國家者貴人而賤祿則民興讓尚技而賤車則

民興藝故君子酌言小人先言

舊本作  
約言

子云上酌民言則下天上施上不酌民言則犯也下不  
天上施則亂也故君子信讓以涖百姓則民之報禮重

詩云先民有言詢于芻蕘

舊凡二節

文公六年晉殺其大夫陽處父晉射姑出奔狄

穀梁子曰稱國以殺罪累上也襄公已葬其以累上之辭言之何也君漏言也上漏則下闇下闇則上聾且闇且聾無以相通夜姑殺者也夜姑之殺奈何曰晉將與狄戰使狐夜姑為將軍趙盾佐之陽處父曰不可古者君之使臣也使仁者佐賢者不使賢者佐仁者今趙盾賢夜姑仁其不可乎襄公曰諾謂夜姑曰始吾使盾佐女今女佐盾矣夜姑曰敬諾襄公死處父主竟上事夜姑使人殺之君漏言也故士造辟而言詭辭而出曰用我則可不用我則無亂其德是不如左氏之核也然而可以戒上不酌民言又從而吐之則彥聖有技者無由而至矣

宣公九年冬陳殺其大夫洩冶

穀梁子曰稱國以殺其大夫殺無罪也洩冶諫于陳靈公曰使國人聞之則猶可使仁人聞之則不可君愧而殺之或以為孔寧儀行父殺之則亦公殺之也夫上之酌民言非以興讓亦以去亂耳上下不言國已亂矣而猶云教讓則是以亂讓也

成公五年夏梁山崩

晉侯以傳召伯宗道遇重者伯宗辟之重人曰辟我不如逕之速也問其所曰絳人也問絳事焉曰梁山崩將召伯宗謀之問將若之何曰山有朽壤而崩可若何國主山川山崩川竭則君為之不舉降服乘縵徹樂出次祝幣史辭以禮焉如此而已雖伯宗若之何伯宗請見之不可如其言而河流孔子聞之曰伯

宗其攘善乎夫伯宗則猶之酌言者也

悼夫人食輿人之城杞者絳縣人年長矣無子而往與於食有與疑年問之曰臣小人也不知紀年臣生之歲正月甲子朔四百有四十五甲子矣其季於今三之一也吏走問於朝師曠曰魯叔仲惠伯會卻成子於承筐之歲也今七十有三年矣史趙曰亥有二首六身下二如身是其日數也士文伯曰然則二萬六千六百有六旬矣趙孟問其縣大夫則其屬也名之而謝過焉曰武不才任君之大事以晉國之多虞不能由吾子使吾子辱在泥塗久矣武之罪也敢謝不才使助為政辭以老使為君復陶為絳縣師而廢其與尉魯使者歸告季武子曰晉未可媮也有趙孟以為大夫有伯瑕以為佐有史趙師曠而容度焉有叔向女齊以師保其君朝多君子其可媮乎勉事之而後可故趙武酌言而魯國益恭酌言之興讓亦謂

此也

左氏曰子產之從政也擇能而使之馮簡子能斷大事子太叔美秀而文公孫揮能知四國之為辨大夫之族姓班位貴賤能否又善於辭令裨諶能謀謀於野則獲謀於邑則否鄭國將有諸侯之事子產乃問四國之為於子羽且使多為辭令與裨諶乘以適野使謀可否而告馮簡子使斷之事成乃授子太叔使行之是以鮮有敗事故子產所謂酌言下天上施者也下天上施者何也雲出於山而施于天霖雨由之滋尺生尺仲尼之所貴也

鄭人游於學校以論執政然明謂子產曰毀鄉校如何子產曰何為夫人朝夕退而游焉以議執政之善否其所善者吾則行之其所惡者吾則改之是吾師也若之何毀之我聞忠善以損怨不聞作威以防怨

作威防怨豈不遽止然猶防川大決所犯傷人必多  
吾不克救也不如小決使道吾將聞而藥之也然明  
曰蔑也今而後知吾子之信可事也夫子產者則猶  
酌召穆公之言也當厲王時使衛巫監謗以告則殺  
之國人莫敢言道路以目王喜告召公公曰是郭  
之也防民之口甚於防川川壅而潰傷人必多民亦  
如之故為川者決之使導為民者宣之使言故天子  
聽政使公卿至於列士獻詩瞽獻典史獻書師箴瞽  
賦矇誦百工諫庶人傳語近臣盡規親戚補察師史  
教誨耆艾修之而後王斟酌焉是以事行而不悖民  
之有口也猶土之有山川也財用於是乎出猶其有  
原濕衍沃也衣食於是乎生口之宣言也行善而備  
敗所以阜財用衣食者也民慮之於心而宣之於口  
成而行之胡可壅也若壅其口其與能幾何故仲尼  
所謂酌言亦取於此也然明取之而以  
壅為嘗不然叔向亦無所得於然明也

楚子虔畏子張之驟諫也謂史老曰吾欲已子張之諫若何對曰用之實難已之易矣若諫君則曰余左執鬼中右執殤宮凡百箴諫吾具聞之矣寧聞它言白公又諫王如史老之言拒之白公曰昔殷武丁能聳其德至於神明以入于河自河徂亳於是乎三年默以思道卿士患之曰王言以出令也若不言是無所稟令也武丁於是作書曰以余正四方余恐德之不類茲不言由是以象夢求四方之賢聖得傅說以升為公而使朝夕規諫曰若金用汝作礪若津水用女作舟若天早用女作霖雨若乃心沃朕心若藥不瞑眩厥疾不瘳若跣不視地厥足用傷若武丁之神明也其聖之獻廣也其知之不疚也猶自謂未艾故三年默以思道既得道猶不敢專制使以象旁求聖人既得以為輔又恐其荒失遺忘故使朝夕規誨曰必交修予無予棄也今君或者未及武丁而惡規諫者不亦難乎齊桓晉文皆非嗣也還軫諸侯不敢淫

逸心類德音以得有國近臣諫遠臣諂與人誦以自  
誥也是以其入也不過一同而至於有畿甸以屬諸  
侯至于今為令君君不度憂於二令君而欲自逸也  
毋乃不可乎周詩有之曰弗躬弗親庶民弗信臣懼  
民之不信君也故不敢不言不然何急以言取辜也  
王病之曰子復語不穀雖不能用吾愁寘之於耳對  
曰賴君之用也故言不然巴浦之屏聲兕象其可盡  
乎而又以規為瑱也遂趨而退歸杜門不出七月而  
有乾谿之亂故上不酌民言則視之乾谿矣乾谿者  
葛藟之窮也然則貴人而賤祿尚技而賤車何謂也  
曰車祿者所以勸言也虞書曰敷奏以言明試以功  
車服以庸卷阿之詩曰君子之車既庶且多君子之  
馬既閑且馳矢詩不多惟以遂歌  
言夫上酌民言而慶賞式序者也

讓善章第十二



子云善則稱人過則稱已則民不爭善則稱人過則稱已則怨益亡詩云爾卜爾筮體無咎言

子云善則稱人過則稱已則民讓善詩云考卜維王宅是鎬京惟龜正之武王成之

舊凡二節

隱公五年春公矢魚于棠

冬十有二月辛巳公子彊卒

會戎則不日不月謂無王也矢魚亦不日不月矢魚亦無王乎曰非禮也非禮則近於無王也然則隱公不命大夫而謹日月於公子彊何也曰春秋之貴讓善也貴引過也所以勸民而興行也左氏曰公將如

崇觀魚者臧僖伯諫曰不可凡物不足以講大事其材不足以備器用則君不舉焉君將納民於軌物者也故講事以度軌量謂之軌取材以章物采謂之物不軌不物謂之亂政亂政亟行所以敗也故春蒐夏苗秋獮冬狩皆於農隙以講事也三年而治兵入而振旅歸而飲至以數軍實昭文章明貴賤辨等列順少長習威儀也鳥獸之肉不登於俎皮革齒牙骨角毛羽不登于器則公不射古之制也若夫山林川澤之實器用之資卓犖之事官司之守非君所及也公曰吾將略地焉遂往陳魚而觀之僖伯稱疾不從冬十二月辛巳臧僖伯卒公曰叔父有憾于寡人寡人弗敢忘墓之加一等生不酌其言沒而禮之無益也雖然公猶未忘善也猶未忘過也進其道也亦可以勸

僖公三十三年春王二月秦人入滑

夏四月辛巳晉人及姜戎敗秦師于殽

先年冬晉侯重耳卒杞子將叛晉使告於秦晉人卜之曰將有西師擊之必捷馬方秦之伐晉喪也穆公訪諸蹇叔蹇叔曰勞師以襲遠非所聞也師勞力竭遠主備之其誰不知公辭焉召孟明西乞白乙師出於東門之外蹇叔哭之曰孟子吾見師之出不見其入也公使謂之曰爾何知爾墓之木拱矣蹇叔又哭而送其子曰晉人禦師必于殽殽有二陵焉其南陵夏后舉之墓也其北陵文王之冢也避風雨也必死是間余收爾骨馬及滅滑將還先軫曰秦不哀吾喪而伐吾同姓秦則無禮何施之有遂興姜戎敗秦師于殽獲百里孟明視西乞術白乙丙以歸遂墨以葬文公文嬴請三帥而復之秦伯素服郊次嚮師而哭曰孤違蹇叔以辱二三子孤之罪也不替孟明孤之過也大夫何罪且吾不以一眚掩大德及彭衙之役秦

師再敗左右皆曰孟明之罪也必殺之秦伯曰孤之罪也苟良夫之詩曰大風有隧貪人敗類聽言則對誦言如醉匪用其良覆俾我悖孤實貪禍以累夫子夫子何罪爰作秦誓受責若流詢茲黃髮故如秦穆公可謂善則稱人過則稱已者矣

晉無公族為驪姬之詛也及成公立乃宦卿適子為之田以為公族又宦其餘子為餘子其庶子為公行晉于是有公族餘子公行趙盾請以括為公族曰君姬氏之愛子也微君則臣伙人也公許之于是趙盾退為旄車之族使屏季以其故屬為公族大夫趙盾其補過者乎桃園之釁為法受過未謂之引過也旄車之族君屏季而自謂狄人夫猶有趙襄之思乎故以寡怨已爭再見于經其所處過則亦有道也

宣公十一年冬十月楚人殺夏徵舒

# 丁亥楚子入陳

楚人殺夏徵舒未足以著楚子也楚子入陳則足以著楚子矣左氏曰楚子為陳夏氏亂故伐陳謂陳人無動將討於少西氏遂入陳殺夏徵舒輟諸東門因縣陳陳侯奔晉申叔時使於齊及復命而退王使讓之曰夏徵舒為不道弑其君寡人以諸侯討而戮之諸侯皆慶寡人女獨不慶寡人何故對曰猶可辭乎王曰可哉曰夏徵舒弑其君其罪大矣討而戮之君之義也抑人有言曰牽牛以蹊人之田而奪之牛蹊者信有罪矣奪者得毋已過乎諸侯之從曰討有罪也今縣陳貪其富也以討名諸侯而以貪歸之毋乃不可乎王曰善哉吾未之聞也反之可乎對曰可哉吾儕小入所謂取諸懷而與之乃復封陳鄉取一人馬以歸謂之夏州故楚莊之引善秦穆之悔過雖桓文未之逮也蹇叔申叔時二人者秦楚之著龜也

宣公十有二年夏六月乙卯晉荀林父帥師及楚子

戰于郟晉師敗績

敗非一日也月而日之自晉之敗無如此日也楚既敗晉次于衡雍潘黨曰君盍築武軍收晉尸以為京觀乎楚子曰非女所知也夫文止戈為武武王克商作頌曰載載干戈載橐弓矢我求懿德肆于時夏允王保之又作武其卒章曰耆定爾功其三曰敷時綏思我徂維求定其六曰綏萬邦屢豐年夫武禁暴戢兵保大定功安民和衆豐財者也故使子孫無亡其章今我使二國暴骨暴矣觀兵以威諸侯兵不戢矣暴而不戢安能保大猶有晉在焉得定功違民猶多民何安焉無德而強爭諸侯何以和衆利人之幾安人之亂何以豐財武有七德我無一焉何以示子孫其為先君宮告成事而已甚矣楚莊之讓也以善與人

以過自與自秦穆而後未有及此者也

雞澤之會晉悼公之弟揚干亂行於曲梁魏絳戮其僕晉侯怒謂羊舌赤曰合諸侯以為榮也揚干為戮何辱如之必殺魏絳無失也對曰絳無貳志事君不辟難有罪不逃刑其將來辭何辱命馬言終魏絳至授僕人書將伏劍士魴張老止之公讀其書曰日君之使使臣斯司馬臣聞師衆以順為武軍事有死無犯為敬君合諸侯臣敢不敬君師不武執事不敬罪莫大焉臣懼其死以及揚干無所逃罪不能訓討至於用鉞臣之罪重敢有不從以怒君心請歸死於司寇公跣而出曰寡人之言親愛也吾子之討軍禮也寡人有弟弗能教訓使干大命寡人之過也子無重寡人之過敢以為請自楚莊而後稱善引過無有如晉悼公者也

襄公十三年秋九月楚子審卒

左氏曰楚子疾告大夫曰不穀不德少主社稷生十年而喪先君未及習師保之教訓而應受多福是以不德而亡師于鄢以辱社稷為大夫憂其宏多矣若以大夫之靈獲保首領以沒於地唯是春秋窳窳之事所以從先君於禰廟者請為靈若厲大夫擇馬莫對及五命乃許秋楚子卒子囊請謚大夫曰有君命矣子囊曰君命以其若之何毀之赫赫楚國而君臨之撫有蠻夷奄征南海以屬諸夏而知其過可不謂共乎故如楚共則亦庶乎自引過者矣

昭公七年秋九月公至自楚

孟僖子病不能相禮乃講學之苟能禮者從之及其將死也召其大夫曰禮人之幹也無禮無以立吾聞



將有達者曰孔丘聖人之後也而滅於宋其祖弗父何以有宋而授厲公及正考父佐戴武宣三命滋益恭故其鼎銘云一命而偃再命而偃三命而俯循墻而走亦莫余敢侮饘於是粥於是以餽予口其共也如是臧孫紇有言曰聖人有明德者若不當世其後必有達人今其將在孔丘乎我若獲沒必屬說與何忌於夫子使事之而學禮焉以定其位故孟懿子與南宮敬叔師事仲尼故唯孟僖子為知過知善也不知善不知過而稱善引過無益也

韓宣子聘於鄭有環其一在鄭商宣子謁諸鄭伯子產弗與曰非官府之守器也寡君不知子太叔子羽謂子產曰韓子亦無幾求晉國未可以貳若屬有讒人交關其間鬼神助之以興其凶怒悔之何及吾子何愛于一環以取憎于太國也子產曰吾非偷晉而有二心將終事之是以弗與忠信故也僑聞君子非

無賄之患無令名之患為國非不能事大字小之難無禮以定其位之難夫大國之人令於小國而皆獲其求何以給之一共一否為罪滋大它日韓子私買諸賈人既定矣商人曰必告君大夫韓子請諸子產子產又以為不可韓子乃辭曰起不敏敢求玉以徼二罪夏四月鄭六卿餞宣子於郊宣子皆獻馬馬而私覲於子產以玉與馬曰子命起舍夫玉是賜我玉而免我死也敢不藉手以拜如韓起者亦自知過也以善與人以過與己如是以行於天下無往不得龜筮也是仁者之要務也

作忠章第十三

子云善則稱君過則稱己則民作忠君陳曰爾有嘉謀嘉猷入告爾君于內女乃順之于外曰此謀此猷惟我

君之德於乎是惟良顯哉

善稱君而過稱已何義也春秋之法不阿人善不誣人過不以善奉人不以過貶已亦本於仁恕敬嚴先內而後外而已善則稱君過則稱已其謂叔孫豹公嫫之行與非謂叔孫豹公嫫之行也謂夫元咺之訟衛侯季孫之詐昭公入不可告於內出不可順於外謀猷內匱而否德外聞者也春秋之法君臣父子夫婦昆弟則皆無競也詩書之有詭詞詭而正春秋之有隱義隱而嚴正以導君上嚴以治臣子各有所取之也夫謂季札子之義與出聘諸侯正於四方而不道其內惡

隱公三年三月庚戌天王崩

秋武氏子來求賻

言夫魯之不賻也穀梁子曰歸死者曰賵歸生者曰賻歸者正也求者非正也周雖不求魯不可以不歸魯雖不歸周不可以求之求之為言得不得未可知之辭也交讓之穀梁子之論則是也其交讓之則非也君臣之義信無交質疑無交讓同善而臣取微同過而臣專多天王之崩五月矣而魯賻不至乃使王人求之天王何過之有然則天王使宰咺來歸惠公仲子之賵無與分過者過不在天子與曰於是平王老矣魯侯所謂宗老也周室既遷魯鄭是賴成其所讓愛其所親聲子不為嗣夫人則仲子為嗣夫人趙姬之下隗氏春秋不非則何為其非之也平王亦若曰予一人且老矣邇死而厚生亦宗國之義也而魯侯不復浸及二年有求賻之愁詩曰叔兮伯兮寢如充耳魯隱公之謂也夫春秋則猶不非其公也

七年冬天王使凡伯來聘戎伐凡伯于楚丘以歸

以歸者何歸乎歸戎則魯當討戎歸魯則魯當自討也魯不討戎又不自討則是戎魯也戎魯者謂有潛唐之盟存焉而穀梁子以為戎衛則猶薄之乎戎衛也

### 九年春天王使南季來聘

於是桓王之立七載矣而公不朝周其不朝周者何曰吾以攝則不得以諸侯見不得以諸侯見則不得以諸侯致討然而會盟之事公固以諸侯自與也以諸侯自與天子亦因而與之來聘不來錫命則猶之乎半與也而公得以辭曰桓少云耳少固足與於弑矣故曰天子無過而諸侯無善也

### 桓公四年夏天王使宰渠伯糾來聘

桓公之立於是三年矣惠公仲子之賈則亦可以報也凡朝聘禮幣各有典章重幣匱于侯國則彛供乏

於天府雖管子子產未之能正也魯又無宰馬故使善獨專於天子而過獨專於魯國也然則魯桓弒君天子不能討也又使宰來聘天子獨無過與曰天子何過之有舍御立戲則宣王行之舍聲子命仲子則平王行之立君致聘則猶王府之舊也天子何過焉夫將有鄭之禍乎鄭不朝王王得而討之魯不朝王王不得而討之以聘為討王亦有所不得已也

五年夏天王使仍叔之子來聘

秋蔡人衛人陳人從王伐鄭

鄭伯叛王而猶畏於齊魯齊魯者甥舅伯叔之與也齊與鄭如紀則王不得不聘于魯是非禮聘也間年而至以卿大夫之不間告于伯氏伯氏與王則勝在王伯氏與鄭則勝在鄭伯氏中立則王鄭兩競衛陳

蔡何力之有詩曰叔兮伯兮  
靡所與同魯桓公之謂也

八年春天王使家父來聘

冬十月雨雪

祭公來遂逆王后于紀

家父來聘卜主后也祭公來逆得遂事也禮卜后使  
魯主之魯宗國之長凡蔣邢茅胙祭周公之胤也凡  
伯之聘祭公之來皆禮也其取女於紀則未為得也  
取紀之未為得何也齊紀惡也鄭始叛周與齊襲紀  
襲紀不克而取后於紀則齊必重惡于紀紀以后故  
又必取勝于齊則周有弱后之累無彊諸侯之奉詩  
曰會且歸矣無庶予子憎家父祭公之謂也然則冬  
十月雨雪何也曰是陰陽之事非王諸侯之所治也

莊公元年夏單伯逆王姬

秋築王姬之館于外

冬王使榮叔來錫桓公命

王姬歸于齊

榮叔之來錫王不稱天是為王有過與曰王何過之有為鄭也而來聘若假鐘鼓馬為齊也而來聘若假玉帛馬王之取女於紀而歸姬于齊皆以親魯也且以解齊紀之怨天王何過之有然而不天何也曰通辭也亦已微馬耳魯之力不足以勝鄭道不足以警齊王亦已知之矣而猶且為之親親之至也以

桓公十有五年春二月天王使冢父來求車三月乙



未天王崩

車者近於暵也。暵者乘車馬六匹，文繡衣一襲，覆地蹟貨則不倫，求暵則不祥，是為天王有過，與曰是何過之有。大路大旂，夏后之璜，封父之繁，弱周室之所分，魯也。東遷之幾時而乘馬不入，何以責江漢故周之書。天王所以別楚也，其為宗室之事，則書王馬已別矣，無所復過也。

莊公五年冬公會齊人宋人陳人蔡人伐衛

六年王人子突救衛

夏六月衛侯朔入于衛

秋公至自伐衛

公羊子曰曷為或言致會或言致伐得意致會不得  
意致伐是得意矣何以致伐不敢勝天子也夫是則  
已勝天子矣王人救衛不克衛侯朔入而殺公子洩  
公子職故公子黔牟于周則已勝天子矣然而不書  
不克為公故致善於  
天子而殺公之過也

### 僖公二十四年冬天王出居于鄭

公羊子曰不能乎母也穀梁子曰失天下也不能乎  
母而失天下則何以不去王正天不去王也故王之  
與正正之與天非義也王子帶之禍蓋自惠王時而  
有也常棣之難急于周公麟趾之衰頽于蒞國而以  
不能事母過督襄王諸侯偃然以觀狄鄭之難嚮無  
桓文則九鼎之隕久矣天王出居鄭亦有過焉天王  
何過  
之有

二十八年冬天王狩于河陽

壬申公朝于王所

天子之就晉侯非過也晉侯受命出入三覲再拜稽首而謂晉侯之敢于召王者過也然則晉無召王與曰至溫河陽而不至京師則是召王也魯則無過焉耳

三十年冬天王使宰周公來聘公子遂如京師遂如

晉

聘以公朝以諸侯諸侯朝報以公以是為善也然而非其志也則亦諸侯之過也

文公元年春天王使叔服來會葬

夏四月丁巳葬我君僖公

天王使毛伯來錫公命

自平王以來五王矣桓王之崩六載乃葬以待天下之諸侯天下諸侯無有至者惠王之喪逾年乃訃以待天下之諸侯天下之諸侯亦無有至者僖公之薨方三月而叔服銜命已儼然至矣為天子者亦何過之有然則文公之立初未錫命者與古者諸侯訃于天子天子遣使立子於殯官之側然後立于賓階受弔就位桓公生未有命沒而後命之文公已葬而後冊命則猶未為晚也諸侯已媮弁髦王室崛起之輩胥命於蒲錫命之先後天王亦遲之久也久而後與之然至于桓公亦可以已矣

四年冬十有一月壬寅夫人風氏薨

五年春王正月王使榮叔歸含且賵

榮叔者榮夷公之後也榮夷公與虢石父比而亡周  
五世屬絕猶為卿士楚則未有是族也以為再見從王  
馬亦無所貶使以賵妾為不可則未見為君母馬而  
妾命之又何以命于妾子而為嗣君者也故榮叔之  
絀王猶王之  
絀于榮叔也

宣公十年秋天王使王季子來聘

是年也春王正月公如齊公至自齊王使來徵聘夏  
孟獻子仲蔑聘于周王季子之來故為報聘也禮失  
於諸侯而不失于天子夫以周定王之明也劉康公  
之能也王孫滿之敏也一言而折江漢之師猶以是  
聘問不失之為多過則  
亦難乎其為守府者矣

成公元年秋王師敗績于茅戎

戎數與周為難邠垂之役甘大夫乘而敗之將復報周于是晉侯使瑕嘉平戎于王單襄公如晉拜成戎還劉康公將遂伐之叔服曰不可背盟而欺大國背盟不祥欺大國不義神人棄之將何以勝不聽遂伐茅戎三月敗于徐吾氏如是為天子之過乎為王季子之過乎或謂天子之懦也使王札子殺毛伯召伯於是羣子各自為政劉季子伐戎而王不取夫使戎伐王而王無以報者誰乎非晉必鄭非魯必衛也公羊子曰孰敗之蓋晉敗之或曰賀戎敗之然則曷為不言晉敗之王者無敵蓋若自敗者然然則曷為不言瑕嘉敗之瑕嘉則猶之祝聃者也

成公八年秋七月天子使召伯來錫公命

是簡王也錫誰為成公也天子不錫公命公亦自與也故從而錫之天子於是易與矣將謂過在天子乎哉

### 襄公三十年夏天王殺其弟佞夫

#### 王子瑕奔晉

夫是則過在天子矣自天子之家言之也家人之九五  
是天子也曰王假有家交相愛也其上宗廟也曰威如之吉反身之謂也靈王之弟儋季卒其子括將嗣服見王而歎單愆期曰烏乎是欲王矣入告王曰是括也不感而願大視躁而足高心在他矣不殺必害王曰童子何知及靈王崩景王立儋括謀立王子佞夫遂圍蒍逐單愆期五月癸巳尹言多劉毅單蔑甘過鞏成五子殺佞夫括與瑕奔晉故殺佞夫者非

王也而王受其名王以睽反于家人也不如反身終  
王之身而王室乃亂世無盟主子朝崩離黃父之盟  
不珍厥孽卒使尹召抱冊  
入楚夫獨景王之過也乎

昭公二十五年九月己亥公孫于齊次于陽州

是秋大雩將逐季氏也公為公果公賁與郈氏主之  
公告子家懿伯懿伯曰讒人以君懷幸事若不克君  
受其名不可為也公退之辭曰臣與聞命矣言若洩  
臣不獲死乃館于公叔孫昭子如闕公居于長府九  
月戊戌伐季氏入之平子登臺而請曰君不察臣之  
罪使有司討臣以干戈臣請待罪于沂上弗許請囚  
于費弗許請以五乘亡勿許子家子曰許之政之自  
出久矣隱民多取食焉日入慝作勿可知也郈孫曰  
必殺之俄而叔孫與孟氏之徒皆叛遂伐公徒子家  
子曰諸臣實為之公不與聞公可止矣公曰余不忍



也遂辭墓孫于齊次于陽州子家子勸公如晉不聽  
叔孫姑曰闕歸責季孫勸季孫迎公歸公徒以為不  
可昭子遂祈死也衛獻公之暴有孫文子公子鮮而  
卒以反國以昭公之嬖也得子家羈叔孫姑為之左  
右而卒以没于乾侯悲夫夫亦有嘉謀嘉猷而莫之  
肯從也詩曰我龜既厭不我告猶如穆叔昭子寧武  
過歸已不以過歸君者矣

### 作孝章第十四

子云善則稱親過則稱已則民作孝大誓曰予克紂非  
予武惟朕文考無罪紂克予非朕文考有罪惟予小子  
無良

善稱親而過稱已何謂也其為穎封人鄭莊公之事與曰為申生及壽之事也申生及壽未足以與於此也而與之何也君親之際以過自與則必有隱隱焉而申生及壽其至者也恒言不建嘉辭無文何稱善引過之有其謂我莊公與詩曰母氏聖善我無令人則謂我莊公者也莊公何引過之有公羊子曰念母也桓公既葬夫人孫於齊愬齊則絕其母絕母則難其子齊亦悔禍也謝之以彭生維之以王姬王姬卒于齊而莊公為之服大功之喪大功之喪齊侯所宜服之於文姜也或曰公于齊侯亦宜為之大功于是功衰矣而公以意明之是公所以作孝也然則許子止不足以與于此乎曰許子止之法盡矣善過皆無所歸飲罪而已矣是春秋之義也

敬美章第十五

子云君子弛其親之過而敬其美論語曰三年無改於父之道可謂孝矣高宗云三年其惟不言言乃謹

是無所取於莊公也曰何無取於公也公避母黨不敢娶於齊者二十有四年及文姜薨齊好將絕齊亦重絕魯也齊侯要我以高侯申之于穀申之于扈以為親之過亦可以弛矣於是不弛則亦無所弛之也故卿迎夫人之禮則於此廢之春秋之義于先公有敬有弛冕而親迎仲尼所貴終春秋之世行之者一公而謂君子不與其親迎則是子翬仲遂又相與旁皇于道也故春秋于莊公弛者有二敬者有二觀社也丹楹鬲幣也文而壞法君子弛之如齊納幣也如齊逆女也質而近禮君子敬之夫以莊公親聞子翬之禍四十不娶躬行親迎而世猶嗷然非之則君父遺行之可敬弛者少矣然則春秋無討君夫人之法

乎曰王者無之霸則有馬王者以家人之道治天下  
及身而戚戚而吉霸者以睦之道治其家及目而異  
異而傷春秋王者宥文姜之卒齊桓霸者董  
哀姜之喪由是以觀或弛或敬蓋可知矣

莊公二十有一年秋七月夫人姜氏薨

二十二年春王正月肆大眚

癸丑葬我小君文姜

肆大眚其為文姜與猶與衆弛過也與衆弛過即不  
言弛過吾得所以弛過者馬葬我小君其為敬美者  
與美亦與衆也即不言敬美吾得所以敬美者焉然  
則姜氏或薨于齊或薨于莒何書之乎亦曰薨于齊  
至自齊薨于莒至自莒若比而已然則其稱我小君  
何謂也曰告于外國之辭也然則何為不別而絕之

曰夫人之罪未至於滅祀也  
詩之所刺春秋不更刺也

莊公二十有四年夏公如齊逆女

秋公至自齊

八月丁丑夫人姜氏入

公羊子曰其言日言入何難也其難若何夫人不僂  
不可使入約然後入穀梁子曰入者內弗受也日入  
惡入者也何用不受也以宗廟弗受也君子曰是無  
所敬之已多乎美若其過者則亦可以弛矣曰是盟  
主之誼也然則盟主禁人復讎乎曰復讎之義親讎  
則讎之親不讎則亦不讎也王鈇柄上或束于道或  
束於法

僖公元年秋七月戊辰夫人姜氏薨于夷齊人以歸  
十有二月丁巳夫人氏之喪至自齊

二年夏五月葬我小君哀姜

左氏曰君子以齊人之殺哀姜也為已甚矣女子從人者也從人何也弛哀姜之過也共仲弑君哀姜與聞首惡未得而賊其主母以為重于文姜也非莊公之志也然則春秋彼之何也曰氏之不去其夫人未為重討也葬我小君則猶哀之也霸者自霸王者自王霸者尊尊王者親親然則何以弛之曰反哭祔廟禘而致之則已過然則禘而致者謂是哀姜乎曰非哀姜也閔宮之八章曰令妻壽母蓋謂公夫人也

宣公元年春王正月公即位

公子遂如齊逆女

三月遂以夫人婦姜至自齊

婦者從夫之稱也非為從姑之稱也以姑逆婦而又加之公子則公子造亂者也以公子逆婦而又繫之姑則是姑造亂者也春秋弛其造亂者而敬其成禮者曰是夫人之志也夫人得而命之夫人得而取之若敬嬴之與出姜邈不相與者使後世見之但以罪遂之以夫人也是夫人無過而仲遂過也然則季孫無過乎曰季孫者仲遂之穀也遂其嚆矢焉耳

宣公八年夏戊子夫人嬴氏薨

冬十月己丑葬我小君敬嬴雨不克葬庚寅日中而

# 克葬

敬嬴身與於亂殺子惡子視而春秋無譏焉無譏則曰不克葬克葬何也曰是陰陽之治非聖人之所治也以桓公之威也不得以霸道治哀姜而謂聖人以神道治敬嬴則豈不滋過者乎

## 成公十四年秋叔孫僑如如齊逆女

### 九月僑如以夫人婦姜氏至自齊

穆姜不氏而齊姜有氏何也齊姜敬而穆姜弛也穆姜之弛以僑如故而于仲遂弛之何也仲遂之於僑如濟美也公羊子曰夫人何以不稱姜氏貶曷為貶譏喪娶也喪娶貶公一體而貶夫人穀梁子曰大夫不以夫人以夫人非正也刺不親迎也然則宣公之貶為喪娶成公之貶為不親迎無貶夫人者而曰弛




敬嬴與穆姜何也曰是仲遂僑如之所兼與也敬嬴之婦仲遂以之穆姜之婦僑如以之婦則不同而所以之夫人一也故于同辭之間而微為致異其所致異者何曰齊姜氏而穆姜不氏也

襄公九年五月辛酉夫人姜氏薨

秋八月癸未葬我小君穆姜

夫是則弛敬交至也敬嬴之葬以雨奪其日穆姜之喪以婦奪其櫛是聖人所不討也聖人於宣敬其母于襄敬其祖母曰是國家之大事宗祧存焉耳微文去取聖人亦有所不貴也然則無改乃謹之義何也曰魯人所惡季文子也君方在殯而逐其所惡粟乎若不可朝夕者是亦孟莊子之所惡也君子之於孝讓致一馬耳



坊記集傳卷一